

曲園叢書

14
484
49



門 4
號 484
卷 49



文章之事舉本以賅末因源以達委是惟無作作則不
期其工而天下之工者無以尙木之大者參天蔽日垂
蔭十畝而方春著花未嘗不旖旎焉水之大者包山絡
川漑田千里而因風起瀾未嘗不淪漣焉觀水木而惟
旖旎淪漣之愛則與在盆盎沼沚者何異惟詩亦然古
之善爲詩者不於詩乎求也俶儻之才英偉之識深博
無涯涘之學積而不已則以其餘溢而爲詩觸境而發
稱心而出無不曲折而奔赴斯時草木萬彙盡爲我機
杼風雲百怪皆入我鑑治言其所欲言得其所獨得無
意爲詩而詩工豈與夫摛章績句分唐界宋者同日而

言序
語哉德清俞蔭甫太史向在詞垣有聲及視學中州罷
歸僦居吳市鍵戶著書矻矻不倦所撰羣經平議闡發
故訓說經家以爲指南諸子平議屬稿未出學者延頸
企望余習聞太史名未獲數見今年春制府馬公延主
西湖詁經精舍乃得時相過從太史課士崇經術獎樸
學不徒尙詞章之美卽其所宗主者可知也一日偶出
所爲春在堂詩集示余余於學無所得風塵鞅掌詩又
不暇以爲其何足以知太史之詩哉然嘗論古作者之
旨則有在矣太史之詩寓新變於法度之中發神悟於
意象之表天才雋邁絕去吟哇驟讀之清奇秀拔若古

幹之疎峭而洪波之激盪也徐測所由則與余所謂觸
境而發稱心而出曲折奔赴萬象畢會者乃無不合是
豈猶夫世之爲詩者與太史曩官京師不嗜榮利蕭然
有山水志旣歸徜徉湖山壹意著述於名位起落一不
挂懷此其胸次夷曠過人絕遠固宜其詩超出埃壘而
世之僅以詩稱太史者猶未爲知言也校刻旣成輒書
所見相質是爲序

同治七年十月中浣湘鄉楊昌濬撰

乙卯編春風詩譜八餘圖上題賦四外春在堂詩編一

劉如中平少潤筆數外外山德清俞樾夫春日無盡
豐沛蘭陵菊花歌言以悲會士我戀下春蘭又外餘蘭

道光乙未歲予年十有五即侍萬夫人讀書於南蘭
陵主人海陽汪君樵鄰喜酒好客每至菊花時與客
分題選韻有蘭陵菊社詩行於世予時亦有所作然
賦皆不足存姑存此以志當時裙屐之樂云爾
秋風秋雨蘭陵城繞城菊花如雲平花農擔花入城賣
萬家秋色肩頭輕殷勤折花向我道此花不如城外好
士入朱門顏色低女藏金屋年華老東門城外竹籬笆

竹籬笆內老夫家諸君無事試過我與君徧看城東花
書生各有看花癖一枝短筇幾兩屐花農一見迎花開
笑揀好花指向客城中愛花不惜花苦將新樣年年誇
根被鐵絲盤屈曲枝從蠶斗插橫斜幾人解看花真面
今來城外真花見一叢月下舞霓裳一叢風裏搖金綫
獨憐零落滿天星籬邊瘦影佞伶仃碩人黃裳豈不貴
妖冶不如尹與邢霓裳金綫及滿天星並菊名萬頃黃花看未足花
農招我坐茆屋自言抱甕作生涯纔了春蘭又秋菊蘭
陵城中年少郎爭選花枝侑客觴誰料老夫看已厭落
英歲歲春爲糧話久斜陽上城堞拗花贈我連枝葉歸

去不知滿袖香但驚飛滿黃蝴蝶

丁酉鄉試廁名副榜漫書數語

嫦娥愛惜月中桂乃煩玉斧分吳剛嗟我不才夏年少
得此已覺非所望食雞棄肋亦可惜捉虎持頭何敢當
畫工愛作不了樹美人喜爲半面妝獨念男兒恥遲暮
青雲努力爭先路佗日終當傲沈嵒我亦月宮游兩度

梅花

紫萬紅千夢已闌天雷冷豔雪中看頗參遷史三分潔
也學郊詩一味寒清友林閒如爾少素交世上得人難
風流我笑明皇假不愛梅花愛牡丹

聞戒篇

辛丑八月海氛甚惡余僑寓仁和之臨平其地距尖
山海口百里而近議者以爲危聞見所及爲詩四章

題曰聞戒

衝颺海外起宿鳥林中飛吾家環堵室無事不啟扉昨
聞海氛惡出門問是非是時天戒寒雨後日色微傳呼
縣官來父老迎旌旗官言寇甚急一方如病痲止可守
鄉里去此將何依爾曹各努力學箸短後衣嗚呼三鎮
兵甲胄老生蟻一朝盡敗沒火伴歸者稀吾民素恇怯
豈足張兵威

不聞春爾糧不見治爾裝老幼一船載不知往何方皆
云寇且至安問梓與桑復有多田翁欲去憂田荒姑且
營菟裘一椽租山鄉那知山中地狐狸而豺狼有朝伏
莽起空爾橐與囊客自杭州來亦言如蝸蟻十室九則
空存者心傍徨頓令數日內價高黃頭郎噫嘻此何象
平日真羲黃

軍門下一檄爾民其偕來遂令草莽臣競拜御史臺周
生何齟齬雲笈
孝廉大吏曰爾才卑爾銀一流聊治酒一杯
爲我酌鄉里毋或生疑猜人各自爲守寇來何有哉長
揖謙大吏敢弗竭駑駘退而謀之衆衆皆癡如雷小市

鑄劍戟健兒集輿僮聚櫟夜數輩磨盾日幾回一笑語
諸公公等皆將材
我家烏山下尙有屋數間此邦旣誼闢不如歸故山艤
舟柴門外迎者雙白鷗室中舊木榻門上新銅緩奴樵
山之麓婢釣溪之灣東家刈稻公西家采菱還是時新
穀入農務方就閒家家招食新村酒盛花蠻頗怪避地
客日日來斂關已聞命召虎未見朝俟獮大息勿復道
吾其田閒跼
長沙桓王美如玉轉鬪江東旗鼓肅同年公瑾亦翩翩

二喬觀兵書圖

風流妙解尊前曲何來嬌女豔如花出自睢陽太傅家
一戰皖城齊解甲雙雙迎取七香車香車迎到紅絲繫
除卻獬兒誰與儷小妹絲蘿託護軍從今臣主稱僚壻
羽檄紛紜無日虛孫郎正讀左公書已知馬上非徒武
冑道蛾眉傻不如不鈔司馬長門賦不寫班姬統扇句
閒來喜讀十三篇閨中手錄曹公注曹公當日負雄才
鄴下新營銅雀臺想見笙歌迎吉利春風諸舍一齊開
其中豈少春風面丞相惟將歌舞選轉眼西陵松柏高
分香賣履徒畱戀東吳女子獨英雄絮語能將兵法通
何怪蠓姬喜環甲劉郎膽落贅吳宮迄今畱得丹青在

明眸皓齒儼相對休將蜀殿玉人誇未許魏宮瓊樹配
走也嶽崎磊落人披圖平視學劉楨勸君莫當真真喚
怕被君家樊素暝

金少參遺印歌

公諱九陞字允納滁之全椒人明萬曆四十三年領
鄉薦過魏瑞祠不拜緣是黜崇禎初副南宮授棗陽
令會流寇蹂楚中公以護顯陵功擢南光祿大官署
正累以軍功晉階至布政司參議會推贛南巡撫病
不能赴逾年而有甲申之變以憂卒公六世孫曰望
欣者於市肆得公名印鐫金九陞印四字徧徵題詠

因爲之歌

劫火一燒盡土梗大官印綬可易餅此印護持有鬼神
不惟其物惟其人惟公生值明運否委鬼當頭壓天子
道旁敕建厥臣祠伏而拜者金與紫公時方與計吏偕
驅車過之不爲止五虎五彪競鬻人爾曹所恃冰山耳
冰山見峴果然消爭看新政思陵朝那知逆案定未久
中原盜起如牛毛幾輩腰間印如斗不能爲國殲羣醜
議勦議撫徒紛紛到處枯城愁不守而公飛鳧來棗陽
棗陽之固成金湯老熊高臥敵膽破脫兔突出軍容強
寇來欲過不敢過護陵功大非尋常自此崎嶇十餘載

公之宦迹彰彰在偶然推稅北新關一祠清惠畱遺愛
惜公負長材節鉞頒未逮解印歸來病已深坐看金甌
欲缺徒增慨一缺金甌不復完驚聞蛾賊滿長安鼎湖
龍去攀無及公亦飄然歸跨蓬山鸞公功洵足光日月
公名惜未登史冊不圖小印鐫公名二百餘年歸趙璧
嗚呼魏公笏重直臣公以忤璫斥非徒披逆鱗武衛槍
褒戰績公以護陵顯不僅推強敵寄語文孫好護持楚
弓復得誰爲之不見歲星降精化作祖龍壘迄今存否
無人知

箭豬

辛丑冬大雨雪德清鄉間忽來一物如豬而巨竊食
羊豕能激豪射人鄉人聚衆斃之莫知何物實卽箭
豬也因賦詩紀之

積雪沒至脛百獸山中藏不知是何物食我檻下羊伺
之物果至搖尾踰我牆謂鏡頭不黑謂穀腰不黃謂獨
喙不短謂豹尾不長但見毛毳然乃有尺半強其本白
而密其端黑有鉞一夫攘臂進頗思斧其吭不能制彼
命而反爲彼傷是物徧體豪有如萬弩張旣異蝟毛細
更較豕鬣剛肌膚傷猶可而乃集于脛相顧盡失色失
色行踉蹌踉蹌走相告環環聚一鄉有竹縛狼筥無木

剗馬柳青石卽利鏃白楛皆長槍爾角我則倚爾鉤我
則鑲近者備其攻遠者防其颺是物失所恃負怒逾跳
踉始若戰沙虎繼若失林麋無何銳亦盡惟賸毛鬣鬣
驅以鐵鉏鉞繫以木倉琅父老扶杖看兒童磨刀忙遠
近齊來問乍見猶惺惺究之是何物有目皆如盲我讀
山海經偶出一語商竹山有豪莖非豺復非狼能以豪
射人見者走且僵吳楚曰鸞豬茲土乃吳疆得毋卽此
物出爲居民殃又讀粵新語語較山經詳云此名箭豬
具生在南方借問始何物則在水中央旣非四足鮪又
非一脊鯧厥名曰泡魚不入羣魚倉生于南海中潮汐

乘泚洋鯤鵬有變化是亦物理常而何一變後徧體如
鍼芒乃知天生物怪哉不可量一編異物志安得云荒
唐吾詩非務博聊復搜枯腸萬事想當然且學蘇賢良

題沈東江先生手卷後

先生名謙字去矜仁和之臨平人明季諸生也此卷
五言詩四十首乃先生避兵寒山有蠲饑觸舟感而
錄此今藏金君兩香家余得觀焉因題其後

東江有遺老蹤跡託垂綸

自署東江漁者

烽火驚殘劫飄零賸

此身小朝惟白版羣盜尙黃巾無限滄桑感高誦泣鬼

神

言一
一棹寒山路淒涼事怕論亂離將半世慘淡此孤村月
落黑無色燐飛青有痕潛行杜陵叟對此欲消魂
先生中夜起老淚滿衣裳袖裏新詩本人間古戰場一
箋和恨寫五字抵城長豈北窮途慟徒成阮藉狂
我亦東湖住遲公二百年河山無涕淚文字有因緣遺
墨畱猶在佳城築尙堅何當一樽酒酌向夕陽天

擬宮詞

一人長門春復秋鐘聲愛聽景陽樓紅顏甘爲君王老
未肯題詩寄御溝

癸卯仲冬將有江右之行親串置酒爲別賦此奉

酬

自從罷作蘭陵遊伏處已閱三春秋貧賤依人不自主
恩恩催上西江舟諸君餞我酒一杯賤子自慙非酒魁
眼底且喜故人對眉頭聊博今朝開噫嘻人生離別鎮
常有百年豈便一株守健者當爲黃鶴飛鄙人合署馬
牛走聽唱陽關弟四聲酒杯到手莫逡巡酒闌人散一
分手從此東西南北人

七里瀧

一灘兩灘灘灘高撐折千張萬張篙遊子驚起坐蓬底
無乃走入山之尻或絢爛如齊女繡或奇怪如楚匠鉋

或勢嶙峋山骨凸或狀磊落石面顛旁列劍鋸山萬朶
中流衣帶水一條不必移以秦皇鐸頗能容得夏后橈
峰迎人起若無路帆隨峰轉仍通橈書生例有看山癖
那怕吹面風刁刁山中亦復有人迹崎嶇一徑橫山腰
頗疑有人出採藥又見有屋新誅茅所惜風利不得泊
麤履未躡南陽苞俯視此水亦清絕波瀾如索加以絢
戢戢魚或露白鬣磷磷石欲生紫蘂世人畏見嚴先生
此下過者皆如迷那知世間佳山水良亦不願俗眼遭
誰與欲買此山隱吾兄不愧大中豪王甫兄去年自江
里瀧之勝有築
室老此中之語人生束髮事名利何異牛馬居闌牢卽

使百齡守簪笏未若半席分漁樵題詩并與山靈約佗
年築屋名雲巢

釣臺

大澤茫茫一釣綸空勞天子降蒲輪如何赤伏陳符者
也是當年同學人

白雲原

在釣臺西唐處
士方千隱處

福命生前薄文章死後靈想因雲太白不許便成青

徐偃王祠

朝發龍游縣小泊徐王祠云祀徐偃王舊有昌黎碑巖
巖姑葭城荒荒大末墟書生弔古意不禁爲長噫穆王

昔盤游萬里一日馳王乃竊仁義乘間起東陲三十六
諸侯以術牢籠之朱弓得既久白俄歸猶遲以此盜神
器豈曰非其時如何一戰後狼狽遂難支有筋無骨軀
徒餒鯁與鮪或云婦人仁豈有萬世規有衆不忍鬪王
死殊堪悲不知殺身慘良由舉事乖既作東侯長當扶
西京衰曷不學蔡公微諷鬪天詩而乃效后羿妄興窮
石師目僅可瞻馬安能揮熊羆祀既百蟲絕身亦沉鷗
夷昌黎作此碑雖頌而實嗤徒與嬴秦氏仁暴爭銖鎰
捍禦一無有烝嘗夫豈宜如何千載下遺址猶未欲試
問穆天子誰奠牲與犧豈非鵠蒼銜轉勝丹朱儀長嘯

未及竟舟子催解維疾風打頭起如見來雲旗

灘行曲

天風蓬蓬吹上頭江水汨汨走下流十里五里作一束
三老失色長年愁長年袂衣立蓬底持篙終日身傴僂
旣憐重如挽牛弩更訝輕若盤蛇矛一灘纔過一灘又
灘聲化作風颼颼織成一幅光明錦拋出千點琉璃球
水中之石何磊磊飛滂日夜恣簸蹂直如山徑走犖确
豈復江面行夷猶長繩曳舟舟不動短篙撐舟舟仍留
竟須大力負之走入水學作吳兒泗南人棹船如騎馬
日月跳擲乾坤浮天公有意弄奇局乃於水底生贅瘤

移山那有夸娥子貨水更無監河侯即使舟輕似赤馬
何堪灘險如黃牛我以丁丑發桐廬始於庚辰至龍游
自庚迄癸又四日計程猶未過衢州黃頭郎既絕有力
青唇婦亦工操舟而乃入險復出險迂迴不復能豫謀
殷勤酌酒勞僮僕勿言艱兀今番尤平生忠信頗自負
風波雖險何足憂再拚灘行四五日山中穩坐青竹兜
由三里灘坐小舟至常山
千山萬山裏棹舟曲折來路餘三里近力仗一夫推舟
甚一夫推之行深壑呼能應層巒到始開太行有盤谷未抵此
紆迴

甘露謠

癸卯仲冬葬我皇先祖南莊府君自始斲板以迄于
封日有甘露降宰樹時樾已至江右 大人書來言
之敬爲謠曰 皇世事而後皆歸真仙將終則結
皇帝在位二十三年冬甘露降于德清東門東東門之
東何處得甘露于我 先祖南莊府君墓是時正營馬
鬣封而乃震震日降墳前樹恭聞甘露軒轅之精或以
瑪瑙貯或以琉璃盛吉雲之國遠難到天乳之星久不
明世間安得有露甘如飴美哉吾家一抔土乃是地之
搖山天之平圃不信但問墓大夫日日甘露自晨流到

午烏乎吾家久住中山陽一經世守兼農桑
南莊府君挺奇質乃蓄道德能文章懷瑜握瑾必有光芒積善
累行必有休祥自非君子之澤流能長何以露華箸樹
成瓊漿小子樾愚無識上願國家翔禮集嘏千萬年下願吾家子孫永永食舊德
齊物詩
茫茫滄海幾生塵世事何勞苦認真仙佛終須隨劫盡
蚊虻也得逐年新
萬人如海浩無邊身作飄飄不繫船相守百年都是夢
偶同一飯莫非緣

休將憔悴感生平眼底榮枯頗不驚萬蠟高燒終是夜
一燈孤對也能明
莫與癡人細較量吾生何處不徜徉出門一步便爲遠
作客十年未是長
呼馬呼牛總此身悠悠俗論未爲真周公也有流言日
盜跖非無慕義人
忘機底事更疑猜私智難將造化推麟出何嘗皆是瑞
螻生亦或不爲災
覆雨翻雲幻蜃樓人生何處說恩讎戲場亦有真歌泣
骨肉非無假應酬

處世休憑意氣雄須知事理總無窮輪蹄易徧九州內
足跡難周一室中
世間倚伏本相因何處亨衢何處屯烏喙毒徧能治病
馬肝美或竟傷人

讀經偶得

禮非自天降乃自人情生近情非其至此語使我驚及
讀曲禮篇而識禮之宏其飯手毋澤竝坐肱毋橫爲主
毋叱狗爲客毋絮羹入戶視必下登堂揚其聲大哉聖
人禮一一如人情惟其如人情萬世莫之異瑣屑諸儀
文已作芻狗棄乃知不近情轉非禮之至

天地一巨物有始必有終一十二萬年何異水流東水
流不復返聖人憂其窮故以一需卦繼彼屯與蒙需有
待之義勿遽言擴充土處苟未病何必深其宮腥食苟
未厭何必尸其饗此義誰知之知者惟羲農故其治天
下不求赫赫功生不知不識死不封文章與禮樂
不及後世工人謂大缺陷我謂真英雄不飲過量酒不
彎滿石弓惟其有未至是以可加隆極盛無以加必至
大亂從月盈魄已見陽盛陰已鍾一日之有夜一年之
有冬不畱其有餘天地無以供所以魯雨生無取叔孫
通

六經皆可註不可註者詩詩人化爲土千古存其辭其辭雖可讀其義不可思卽如谷風篇云是棄婦爲而婦見棄故孔子不必知今欲求其解豈可空言治涇渭何所指方舟何所施必其家庭事瑣屑皆得之而後此詩義明白無所疑不然詩雖存詩義終支離論語首學而其教先自治繼之以爲政而後論所施孟子則不然所重在救時知言與養氣姑弗遽及斯先載齊與梁兩君問荅詞其於本末間似乎到置之尼山與鄒嶧同爲萬世師何敢妄擬議願爲深長思

孟子游齊梁初不言井田及遇滕世子始以此告焉故知井田者一壤不復全齊梁兩大國壤地逾數千豈能細擘畫使如三代前滕則蕞爾國小若彈丸圓地近制易及人少法易傳始爲小試之聊使根本堅介於齊楚間或可旦夕延要其論王政豈在此幾幾後世大一統地盡垓與堦而去聖人世則又千百年張子雖大儒未若孟子賢乃謂治天下必以此爲先世雖不吾信吾志終弗遷行當與學者共買地一阡畫之使爲井八家相鉤連家塾夜橫經鄉飲朝開筵使知古可復所苦惟無權吾昔讀至此未敢信其然一鄉與天下相去猶天淵不見王荆公新法手自編施之於鄞縣鄞縣稱其便施

之於天下天下攻其偏

有物如螭子而大能螫人影夜數見之不知何物

也賦詩惡之

唐堯天子且有蠍而况齷齪如吾徒夜深攜燈照四壁
壁間有物形模糊大者如盤小者如盃六足窸窣雙掛蠱
吾讀爾雅苦未熟爾雖有名無由呼獨念爾非踏影蠱
又非蠮螋與短狐杜伯之鈞斨斧不過傷人肌與膚
爾何螫人慣螫影燭奴燈婢其何辜嘗聞古有至山人
能相人影分榮枯可知形影非二物豈堪與爾爲鉗奴
世間儻有張三影坐教側目如愁胡吾欲滅燭學稽康

自覺悻悻非丈夫行步顧影學何晏畏首畏尾非良圖
不如置我天地中建木千尋影則無

記杭州近事時甲辰二月

二月丁未天初晴大風吹動杭州城黃沙四飛屋瓦走
空中疑有百萬兵風過滿城說異事天竺山中黑雲生
黑雲忽低紅光出紅光旋淡白光明白光走入西湖水
湖水從之空中行一株樟樹隨水起滿城枝葉飛縱橫
吾聞樟樹頗神異大者能與蛟龍爭得無神龍取水與
樹鬪但恨不知誰輸贏又越五日月之望麗譙初打蝦
蟆更居人望見馬坡巷黑煙滾滾吹如飈頗疑回祿降

聆遂萬夫走救鳴銅鉦那知風雨忽然至更兼硬雨如
 彈抨雷公執椎左提鼓依依格格雌雄鳴競傳雷燒火
 藥局局即在馬坡巷風烟眯目都成盲霽後大官走馬看棟宇
 盡失牆垣平城外觀者入城問誰家拔宅上玉京陰蚪
 陽馬隨風起竟如廖廓翔鷓鴣又言風雨未起時先有
 瑞氣空中呈蓮花一朵落城上誤喜佛至焚香迎烏乎
 世間怪事乃有此當年一峰飛來安足驚鄙人作謔記
 其事客有知者當吾賡方今幸逢
 聖人世無勞咄咄雙瞳瞳

玉山常平倉一大樟樹其形如龍蓋倉之神也因

樹為屋以奉神根在屋後穴壁而出復穴南瀾達
 于庭中遂作勢而起高人雲表鱗鬣宛然每大風
 雨柯葉扶搖而棟宇無損亦可異也作詩紀之

天上蒼龍宿何時下吟來七年培雨露百尺撼風雷榦
 老嶙峋立根深屈曲栽之而藏室內突兀起庭隈宿霧
 噴能活間雲攙盡開爪牙撐白日鱗甲劃青苔星落朝
 揆頷霜高夜曝腮每當噓氣出常認作霖回既恐垣牆
 毀兼愁棟宇摧豈知翻巨浪初不動輕埃令我摩挲歎
 難將造化猜秦祠尊怒特夏廟祖神能祀典隨人創天
 池定爾催行當階尺木飛上列仙臺

記江右俗二首

子孫糧

子孫糧欲留餘飯子孫嘗
椀中粒粒白而長棄之不異
糝與糠雖有善飯廉將軍
頗亦每飯不敢忘唐堯捐金
舜捐玉世間可寶惟五穀
君看煙火千萬家所棄何啻
太倉粟郗公含飯哺兩兒
不過聊救兒啼飢君子有穀
貽孫子區區一飯安足貽
勸君鑿底留焦飯一囊奉母
如陳遺

風龍樹

風龍樹風來何方去何處
家家種樹名風龍天半枝柯

自翔翥吾聞龍耳與龍角其說相傳從郭璞後來韻法
論龍穴在堪輿家或未錯奈何以此求之風無乃捕風
風仍空松邪柏邪徒蔥龍此間安得張尋龍佛言隨藍
風一起雖有大樹不足恃勸君種德如樹高自有清風
到孫子

寓齋前有梧桐一株不知誰何書其上曰和同樹

戲作一詩

李君九載此流寓種得梧桐招鳳住未識何時三鹿公
將來題作和同樹君不見天上河鼓號黃姑江中澎湃
稱彭郎又不見戴記慈良作子諒荀子誅賞成詩商在

治忽爲來始滑音雖近而意則妨而肆赦爲內長文字
得半而誼則亡古來沿訛皆一律豈獨侍郎伏獵宰相
麀而况同塵兼和光老氏之學勝于黃故知卿言亦復
佳正宜封植期無忘噫嘻人生呼馬呼牛尙不惡豈其
區區爭一木我欲喚爾觀與榮又恐世人爾雅讀未熟
不如妄聽且妄言莫笑盲心并盲目或如梧敵可借書
猶勝桐桐曾誤讀儻作家訓訓子孫當與白鐵樹同錄

夜發玉山

輿丁是虎輿是龍輿名過山龍輿
丁名爬山虎山石犖确一徑通萬
戶皆扁隻犬吠四山盡黑孤燈紅欲雷不雷電閃閃將

雨未雨雲濛濛螢明復滅燄侶鬼鶴欬且笑聲如翁葛
衣受風凍起粟布被著霧寒生淞輿丁輿丁爾努力前
頭山寺鳴晨鐘

揭曉後謁房考韓厚庵先生知本中弟二有吹索
者遂置三十六歸輿漫賦二詩

不作人問第二流卻來三十六天游身隨傀儡場中轉
文向麻沙板上畱自笑拚飛黃鶴子誰憐辟易赤泉侯
敦槃尙忝宗盟長退舍中原未足羞是科俞氏中式者
尙有六十二名俞
君庸禮九十三
名俞君璜故云

敢把科名比沈崧也曾兩度到蟾宮鷓飛又退原無力

狐搢重埋也有功莫認我爲都瑁噪且呼兄作半英雄
壬甫兄中癸卯榜第十八明年紫陌看花去三十六宮春已通

大霧發錢唐江

大霧漫空吹東西亂塗抹如絮一天飛如墨半江潑如花開髮鬆如塵起跣跋浩如水上上聲潮昏如日中上聲管翳余媿豹隱船頭坐披褐仰觀雲冥冥俯聽水澌澌不知天宇寬彌覺江岸闊頗疑逢蚩尤欲煩帝降妖尙幸風力佳蕭蕭起林末帆腹飽彭亨漿牙鳴撥刺豈惟客愁破兼使詩情活須臾紅日來萬象又軒豁

馬沒村社曲

去嚴州二十七里地名馬沒其俗十年一賽社神綵棚六七坐相對演劇八九日乃止遠近來觀者延一飯具酒肉日數千人以人之多寡占歲之豐歉余過此適遇之因紀以詩

炊煙起共浮雲高萬夫競走山之坳山中隱隱鼓與鼙雜以人語如秋濤有客爲我言此地洵樂土水處爲漁蠻陸處爲牛戶十年一擊神祠鼓治地先平碌碡場分曹競奏雲翹部客來醉飽不論錢有肉在簪飯在釜夜深共數尊前籌今番人較前番浮一巫起舞羣巫詭言神大歡喜錫爾無疆休縲絲絲滿簍積粟粟滿篝我聞

客言頗錯愕此舉可稱樂上樂海內雕剋非從前乃令
豪舉在村落日暮人散朱顏酡魚龍曼衍看如何待取
一十五年後小溪又聽迎神歌小溪距此數十里亦有此會十五年始一舉

緯夫行

扁舟搖搖向西去大風滾滾從西來千搖萬元不得上
一繩力挽聲如雷緯夫數輩負繩立驚濤濺衣衣盡溼
腳下不借雙草鞋頭上夫須一臺笠曉日初出雞子黃
蓬蓬飯飽起束裝江面羣鳧去活潑山頭衆蟻行微茫
爾其王濬水中龍爾其敖曹地上虎萬丈長牽繫口繩
百鈞重挽射潮弩冥濛霧氣山難分天風吹面面欲皺

安得仙家百花橋陵空直上如梯雲

上灘

千山萬山水直下勢如崩巨石扼其衝亂流怒欲鬪遂
令平地間大聲起澎湃豪如鐘夜撞清如琴曉拊日中
走金蛇月下翻銀鵝勇哉黃頭郎健可挽七札一舟作
鼎扛一篙當山拔甚或立水底束腰僅一絛力重千巖
巖身輕一鷓鴣我自發江干已閱晦明八每遇一灘來
相顧目屢眴頗怪造物者有意弄狡獪偏險過閭王磯
高勝羅刹安得起神禹來此更磨刮直須地形平乃得
水勢殺猶憶今年秋雨兩岸尚鳴蜩客枕蝶蘧蘧歸棹鴉

軋軋相去曾幾何又來聽霜鷄以視向所經其難更夏
夏未免悵薪勞且復歌泥滑當勝輭紅中間關走車聲
入徽河後四面皆山蒼翠萬狀復值雪後真奇觀
也偶拈大好二字爲韻作詩二首
昨夜灘聲中一枕恣酣臥曉聞邪許諠遙知險已過平
生看山癖不受寒威挫船頭風雪中久坐竟忘情愛此
萬疊山侶倩巧匠作一峰輕如飛一峰重如馱一峰坐
如倨一峰拜如妾偃蓋松千盤重臺蓮一座我舟隨之
轉迴環蟻走磨更喜山岬間雪花夜來大深處已白描
淺處尙紫羅當作畫圖看會使客愁破

自發錢唐江山山無不好憶從去年來眼界頗一飽今
來此地看前者盡與阜山下有人家完固類新造蠟殼
嵌窗明蛭灰塗壁燥吾聞山中田種麥勝種稻土厚雨
不傷泉深旱不稿春山剗竹胎秋山刷蕨腦際此雪晴
初縛帚定已掃樂哉此中人何異住蓬島倘能來卜居
豈不愜素抱無如朔風吹催上長安道

舟中三君子詩

三君子者舵也篙也纜也一之不具則無以行余嘉
其爲用不同而同力以濟有君子之德爲賦三君子
詩若帆之功出於天幸正如小人因時立功或有過

於君子時去卽委之去矣故不列云

舵

路當平處能持重勢到窮時妙轉移只惜功多人不見
艱難惟有後人知

篙

深山風雪鍊奇材入世偏工挽與推指點教人深處去
支持出我險中來

緯

挽起茫茫既倒瀾旁人誤作繫援看但誇直上扶搖易
那識居高汲引難

到新安贈汪蓮府

儉鏡軒兆若瞻園之芳

曉來寒意襲冠巾自整輕裝束水濱不惜遠尋蒼耳路
只緣中有素心人蘭陵城外同探菊明聖湖邊共采莼
今日相逢雲海裏一樽定爲洗風塵
久擬來題瑞室銘幾年蹤跡竟如萍兩番有約成團雪
一夕無端到客星路似熟游曾入夢語多脫畧爲忘形
此行看盡千山色不及諸君眼底青
贈孫蓮叔 殿齡
興公年少擅風華藉甚才名擬八叉門外驕嘶金勒馬
市中聚看璧人車七擒不放歡場月九錫頻加得意花

媿我一鞭燕趙去相思天半望朱霞

興公 古城巖觀魚

新安山水稱大好我今來遊苦不早名山都被凍雲封
欲往從之媿飛鳥主人招游古城巖一巖頗已兼衆妙
巖前有亭曰半亭亭下有水如帶繞水中戢戢魚千頭
轉覺朱公種尙少未容髣叟帶笈簪那許漁人脫袂袴
地禁捕魚投以香餌魚爭來人無機心物不擾安知其下無
蛟龍頭角養成入未曉倘令仙艾春來吞會見扶搖起
雲表更隨樵步登山巔滿山落葉無僧掃奇樹何從訪
夕陽山有大樹中空可容一人時未之見廢祠已見埋荒草有唐越國公汪華祠蒼

蒼暝色催人歸凜凜寒風生樹杪歸來頽尾薦晶盤一
笑金尊又同倒

萬歲山

相傳明太祖會至此

漢皇登嵩山山中呼萬歲山神不解諛未免疑真偽明
祖登茲山山名與之符不知空山裏曾效嵩呼無於今
山色青蒼蒼萬仞巨石千盤松真人所到即名勝雲氣
非復尋常同嗚呼三百年明祚畢崇禎十七外止有福
王一回首燕京萬壽山可憐龍馭徒蕭瑟豈若茲山掩
薜蘿千秋萬歲總嗟峨太平草木多佳氣莫問前朝事
若何

鍊心石弔金正希先生

蒼松偃蹇作龍吟怪石橫空俯萬尋我輩驚垂二分足
先生苦鍊百年心山中草木英風在江左君臣暮氣采
填海補天無一濟虞淵黯黯日先沈

下水偶成

隱隱雷聲水下灘問誰有力挽狂瀾百年風氣於今悟
一例文章到此難江面石如人磊落磯邊鷺侶客平安
境逢順處須持重說與扁郎子細看

水碓

每逢湍急處水碓置中央佛法金輪大仙人玉杵長勢

驚環轉疾聲訝磨旋忙不是漢陰叟機心未易忘

江行感舊圖

江行感舊圖者孫丈竹孫家球感舊而作也丈少時

侍其尊人苧花大令宦游江西已而其叔祖相國文

靖公督兩江大令引嫌改就京職遂奉其父至金陵

節署丈昆弟均從焉後四十餘年丈復客江右感念

昔游繪圖紀之屬余題詩

江上青山千萬簇山下蒲帆千百幅中有嶽奇磊落人
坐對江山一棖觸自言生小在西江官舍清閒對綺窗
祖父堂前黃髮二弟兄門內白眉雙爾時門第熱可炙

庭列鳧鐘戶檠戟公子花間駕綠車上公天上來黃鉞
一舟和石載歸裝白下雲山接渺茫節度旌旗候行李
亭公弩矢護風霜四十年來春寂寂春風重譜關山笛
記昔風流號壁人而今感慨摩銅狄勸公且勿感華顛
萬事雲煙過眼前但願堅牢仙不老江山重與結新緣

春在堂詩編一

乙巳編

春在堂詩編一

德清俞樾

乙巳新正二日北上

屠蘇一杯酒飲罷卽天涯已迫端門試時新例難遲計

吏偕長途佳伴共謂馬謙香孝廉望眼老親揩未識春風裏看

花願可諧

夜泊常州

毘陵城外路雲樹故依然一雨足暝色孤蓬撐暮煙人
家排水次燈火認隄邊記取舊游地重來已五年

自丹陽乘小車至京口

詩二

一

一夫力挽一夫推滑滑泥中曲折來最苦低昂行石上
隻輪碾起萬重雷
書生生小習江湖乍試輪轅膽未麤如此棄車卽騎馬
不知髀裏肉存無

揚子江

中原一壑自天開日夜波濤走怒雷千古英雄洶浪去
半江樛柳渡春來風從郭璞墳前打雲在焦仙洞口陪
莫笑欲登還未果此遊終擬補南回

時守風二日因雨阻未及登金焦也

渡黃河作

一千七百一川水泡泡渾渾從天來華胥聖子不敢塞

石門千里憑空開出於敦薨注無達東流到海行紆迴
故道一失不可復河渠從古無良才鐵龍濬泥淤轉甚
石犀鎮水久亦頽繫余北轅過河上一宵露宿河之隈
竊思河出昆侖墟其勢定可吞埏埴何乃千里一曲直
如汞瀉地往復回必有太山當其衝約束河伯難爲災
河圖龍象縱荒誕非等方士誇蓬萊一曲規山二精石
地肩地腹皆可推神禹龍門費穿鑿已令萬古驚奇佷
何如於此鑿混沌洪流放出如奔雷不入龍門走滄海
一綫直撼金銀臺中原從此失河患方梁石湏何有哉
我歌未竟復自笑渡河已聽黃

惟勿復妄言馮夷惱

須防爲崇如臺駘

登陶然亭

會得南華秋水意吾心何處不陶然
況從牛馬風塵地來認鳶魚活潑天
人到林泉皆侶鶴車行蘆葦便如船
登臨何必輸濠濮未信相逢是日邊

出都

欲訪蓬山未有因不如歸采聖湖蕘
諸公飽拭看花眼我輩閒留聽雨身
時與王甫兄俱縱遜青雲能到客豈無白首
未來人征衫莫道還依舊添得銅駝陌上塵

崇真宮歌

興濟有崇真宮明宏治十五年爲皇后張氏建后卽
興濟縣人也今興濟縣已裁屬青縣而宮猶存余過
之因爲歌曰

興濟舊縣無垣墉巋然獨見崇真宮
新雨洗來殿瓦綠斜陽照出宮牆紅
青松文梓已無色陰蚪陽馬仍陵風
其旁屬鬣負碑立剔薛得字粗堪通
大書宏治十五載皇帝敕諭頒司空
朕惟興濟百里地祥源福緒長秋鍾
爰命所司建祠宇用昭美報垂無窮
想見新宮落成日實與壇廟同尊崇
大官金紫拜階下小侯蟒玉陪庭中
那知世事一朝改繁華竟與浮雲同
武宗卽世興邸入

大禮議起來張璠孝康已削聖母號延齡難保通侯封
生辰尙免百官賀此地固宜埋蒿蓬况今城郭亦非昔
是何規製猶恢宏鄙人作歌紀顛末以鞍爲几殊恩恩
但願畱作靈光殿佗年作賦煩羣公

項王墓

事去英雄此葬身千秋過者尙悲辛道旁氣壓秦皇帝
帳下情鍾虞美人已擲頭顱生贈客還畱魂魄死成神
彼蒼原借驅除力便道天亡也是真

柳下惠墓

直道世莫容三仕乃三已先生見其大去畱等一屣斥

之固無怨援之亦可止高視臧季輩直與蟻螻似歸去
隱柳下守吾桑與梓遺直聞鄰封嘉言登國史吾鼎吾
自愛怡然以沒齒畱此土一杯生王慙死士竊怪後來
人多未悟此旨屈子汨羅沈賈傅長沙死

夜發陰平

參橫斗轉夜冥冥車鐸郎當喚夢醒遠樹顛風猶未綠
遙山得月始能青問津野渡人難覓沽酒荒村戶尙扃
自笑征夫歸思急一宵未放馬蹄停

余家自甲申歲遷居臨平之史家埭余甫四齡耳
後又徙至今二十二年復遷居史埭舊屋則寅

兒亦四齡矣漫書四十字

故是童時地重來覺有情兒年同我小門戶侶前清暫
作鶯籠寄終輸燕壘成一椽猶未定何況此浮生

雨發錢唐江

纔了春明夢一場又來風雨渡錢唐迷濛雲氣沾衣溼
澎湃濤聲入枕涼山鳥侶窺前度客江神應識去年裝
只愁齒冷嚴夫子歲歲萍身爲底忙

余于釣臺下
往返五次矣

富陽

水複山迴到此收一城斗大壓江流遠連歙浦無平地
俯納胥濤亦上游漠漠寒煙籠雉堞荒荒落日起漁謳

山川形勝今猶昔不願重生孫仲謀

子陵魚

我思嚴夫子變化如神龍見首不見尾歸臥青山中至
今山色青如皴山中無復羊裘人上有千尺百尺之高
臺下有一寸二寸之游鱗老饕一見笑不止咄咄子陵
竟在此素書不報侯司徒白水未忘漢天子桃花浪撲
漁人蓑其中戢戢千頭多秋來已作乾魚麩不知風味
還如何我愛此魚名字好客星化作魚星小幸無攪入
五侯鯖尊前尙恐狂奴惱

將至滄安有地曰響山潭舟人云方臘祖墓在焉

因紀以詩

自從歙浦來山重水更復盤鬱百餘里至此一小束深
藏蚩尤冢險壓黃巢谷惜哉佳山水乃以抔土辱我思
宣和閒朝局屢翻覆道君荒聲色媼相弄威福遘亡女
真熾國勢從此蹙是何東南盜更乃起相續宋江橫淮
徐方臘煽葵睦庸非天亡宋假手代之斲至今千餘載
桑田幾度綠豈此蓬顆地尙在茲山麓但訝峰巒奇峭
不受樵牧昂首試一呼應聲出山腹山神如有知聽客
一言祝但許雲雨興毋使龍蛇伏

重九日抵新安

下澤逍遙事未諧且攜琴劍客天涯田園雖好貧難守
霄漢無媒遠莫階生計依然資秃筆游蹤聊復任芒鞋
此來喜值重陽節獨把茱萸眼屢揩

呼猖歌

紀徽俗

糝初世界徒茫茫問誰死作閻羅王况當
聖世么麼藏方瘞野仲殲游光云何楚鬼越襪外更來
此來聽呼猖團團曉日人聲多萬夫廬走山之坡山坡
襍沓馬與羸神之來兮羣巫歌云此木居士目睥而腹
蟠縱使蔣侯有骨在其奈叔寶無心何吾將爲爾執鬼
中吾將爲爾招鬼雄若有人兮披薜荔來從紂絕陰天

宮爾無懍怛西復東此腹空洞足爾容但願耳目明且
聰左啣右噓無能蒙庶幾長錫一鄉福疥癘不作田禾
豐新鬼笑且呼舊鬼啼烏烏已憐混沌破行見神叢枯
魂兮歸來竟何處一盂麥飯墳前無噫嘻乎吾聞此俗
殊堪驚惟神正直斯聰明山鬼聊知一歲事寄之心腹
無乃輕吾詩且復記其俗由來傳訛無能更不見村氓
打社鼓去賽孫權蕭道成徽有土神曰孫蕭二帝相傳
元末人聚眾守鄉里明初以
土寇誅徽人思其保障功爲立廟
後訛爲孫權蕭道成或云諱之也

蟋蟀歎

客有畜蟋蟀者風雪之夕晨起視之死矣移近爐火

得煖復活如是者已五六次余有感焉爲賦此篇

魯公僵臥手握拳可憐一死三千年不如簡子七日遊
帝所醒來尙記聞鈞天李賀自誇天上樂白瑤宮遠歸
無緣不如歌女被召上天去清歌一曲還人間死生大
矣古所歎鳩摩神呪無從延嗟爾么麼何足道能回造
化天無權藉令蟋蟀修春秋不知滄海幾度成桑田平
生觀物有深慨竊疑真宰無乃偏瘋得已死吹復活馬
虵已斷續更全人生自謂金石堅一暝不視殊堪憐縱
使仙人化鶴歸人民城郭徒茫然感此作歌寄太息幸
無諧入雍門絃

果然奇

先祖南莊府君耄而好學手抄書不下十餘種所用
筆曰果然奇其值止青蚨七而可書二萬字既壞則
付工人治之又可萬餘字今問之邑人不復知此筆
矣敬識以詩

果然奇筆一枝一枝入手雲煙馳世間智巧日日出誰
能奇更如此筆功高欲敵兔毫千價賤止須驚眼七先
祖手治南村廬桐帽棕鞋坐讀書一日手鈔五十紙至
今字字琳琅如鳥呼至今字字琳與琅一枝筆有千丈
光何必豐狐與虎僕斑竹為管珊為牀所惜筆公竟無

冢只留一硯九鼎重請看石面頤欲穿後人敢負讀書

種家有一硯亦先祖舊物磨久幾成穴矣

題戴氏三俊集後

三俊者戴琴莊孝廉福謙及其兄駿伯芬弟羹叔蕪

兩茂才也三君竝有俊才不幸短命身後故人為刻

其詩人各一卷題曰三俊集余與三君有中表之戚

又嘗請業於琴莊孝廉且與孝廉為同年友覽其遺

詩恍如復面而三君之墓草宿矣區區身後之名傳

不傳與九原何有哉因漫書數語於其後蓋不僅為

三君慨也

三株玉樹委蓬蒿幽怨空留楚客騷
爾微名一鼠首較人福命九牛毛
文無可賣如薪賤命竟難回比鐵牢
獨抱清琴真自誤世間多少鬱輪袍

丁未秋周雲笈下第歸寄詩慰之

今春送子游京華缺髻之衣深雍鞞
燄光三丈在頭上愁君燒殺長安花
春風吹夢夢忽醒蹇驢席帽仍還家
手握蛇珠世不識子無一語旁人嗟
男兒自有不朽事勿與衆嫖同嘔啞
纓冠束帶學拜跪如鳳在笈麟在罨
口作箏聲不成語我視其頰頰於戲
世間名利豈不好一骨投地萬犬齧
不如歸掃子斗室左右圖史如排衙

佗人入室詫不識但見束束籤紅牙
君坐其中細咀嚙勝辟穀食餐晨
粳不然春秋選佳日於山之麓溪之
涯沿溪釣月一筇簪入山采雲雙
蹠道逢熟客試問訊何若款段紅塵
搥歸來婦有一斗酒其肴惟何魚鼈
蝦上堂問母母曰善兒女繞膝來呼
爹君於此時樂不樂有如癢得麻姑
爬鄙人十夜九此夢所苦有願囊無
鏟獨坐千山萬山裏不覺心緒紛如
麻安得一稜兩稜地去與隣父同耕
劬佗年有田不歸隱請卽此歌盟以
緞

雨夜作

秋來一夜雨頗喜涼意足那知多田
翁正待曬新穀乃

歎世間事未可以我卜同乎我所遭異乎我所欲而况
天地間茫茫萬億族杜鵑望北飛鷓鴣向南宿鷺沒鳧
則浮羊羣狗則獨保蟲吾同類而意各有屬難將一人
心入此衆人腹不如置勿問問亦弗我告陸雲笑其笑
阮藉哭其哭
天當生好人地當生好物如何驚蟄後諸毒一時出土
中有蠶蠶木中有蛄蠅蜈蚣如箏大蜒蚰如筋直鼓翼
天蟲黃負殼天牛黑壁上長尾蠹溪邊短弧蠶生此竟
何爲徒爲人蝨蟹小齋一雨過咄咄來相逼窗外窸窣
聲燭之又不得先生付一笑吾性故坦率柳圈佩固無

竹筒貯亦弗爾姑爲所爲吾自適其適之蟲亦有知不
入吾之室待之以君子彼將自斂飭防其爲小人吾已
先偪仄

皎皎富家女妝成來堂前衫袖藕絲薄裙袂芙蓉鮮足
下紅錦鞦頭上黃金鈿呵花豔貼鬢鬋葉紛垂肩光耀
射人目目已先無權嘖嘖作何語但道真神仙齟齬與
攀耳彼固勿見焉貧家亦有女丰韻原翩翩布裙而椎
髻見者不復憐烏呼世間事大抵皆同然遂令不平者
起而問之天天公默不荅惟聞雨濺濺不如姑置之我
與我周旋是以窮巷女不賣鏡一奩是以窮巷士不舍

詩一篇

寒蠅

秋蠅凍欲死就暖來依人驅之去復集戀戀如相親蠅
癡我亦癡癡語頗自真男兒方寸中要畱天地春解網
出窮鳥貸水甦枯鱗西風昨夜起吹面面欲皴可憐窮
鄉子敝衣若縣鶉寒衾夜無絮冷突朝有塵書生念及
此雙眉爲之顰不能庇一物媿此七尺身爾蠅獨何爲
依我不知貧蟲寒號益急雀凍飛益馴斯意絕可念拔
劍奚爲瞋獨念平生意豈止區區仁奈何困貧賤有志
無由伸寒僅足爾庇熱亦將人因作詩寄吾感蜚語同

悲辛

客有昔富而今貧者讀余詩而有感因以詩慰之
茫茫身世總堪哀舊日繁華付劫灰坐上酒闌人散去
牀頭金盡券飛來已知明月不常滿爲問春光何處回
領取南華齊物意窮愁詩卷莫輕開

張船山集有作家書望家書二題因各賦一首

作家書

貧士舊有例例與田園離書生亦有例例與妻孥宜况
我老母在固宜親盤匱勿克親盤匱何以慰母慈惟有一
紙書寫到更闌時家貧迫歲暮事事勞如絲如何一

詩二

七

握管欲寫翻無詞首言客中樂次言歸有期不將眠食
累上費高堂思不將羈旅感下使家人知

望家書

老母年六十久謝筆與硯嬌兒甫六齡讀書未盈卷誰
爲報平安千里如覲面傳語親家翁謂周雲笈費君一斗麩
爲我作家書一字當一絹無如客山鄉又乏郵筒便飛
到雙鯉魚頓覺黃金賤開書省日月月圓已兩徧回首
望鄉山白雲有餘戀何當學少游歸去作羈掾

戊申春日發錢唐江舟子焚香祀神余適有感亦
揖而致詞

我於癸卯秋呼舟始過此聽水夜遲眠看雲晨早起江
山如有知此時定我喜及我再來游恩恩迫歲杪眼底
新安山夢裏長安道江山如有知此時定我笑長安居
不易重趁江邊船幼安仍白帽子敬猶青鹽江山如有
知此時定我憐而今年復年蕭然此書劍徒添三斗塵
已短二丈燄江山如有知此時定我厭偃僂揖江神爲
我語古人有宋謝晞髮有唐方補脣雲巢舊約在吾豈
終風塵佗年築屋名雲巢余初過七里灘時句也

新安舟次口占

布帆無恙又新安多謝東風送上灘天以雲山慰游子

詩二
我因奔走悔儒冠春來晴雨真難料客裏鶯花總倦看
寄語故園諸舊侶莫將名利換漁竿

偶成

不成富貴不成仙學作飄飄不繫船傀儡姑隨人俯仰
轆轤自與我周旋書因善忘宵猶看身為多問晝亦眠
飲水自家知冷煖何須更寫衛生篇
年華袞袞去如雲故紙堆中自策勳無可驕人聊嚇鼠
未能忘物尙誅蚊閉門已覺成高隱開卷徒堪佐咫聞
不倚賣文爲活計按頭筆硯竟須焚

壁鏡

壁鏡毒蟲也其狀如蟻子而大善吸人影余前於江
西見之曾賦一詩而不知其名新安亦有之名曰壁

鏡因復賦此

跂跂脈脈善緣壁謂非守宮卽蜥蜴攜燈照壁驚且呼
怪哉非鬼復非蟻主人爲我言是物名壁鏡魑魅爭光
已可虞罔兩問影能無病壁鏡壁鏡奈爾何卻背疾走
影愈多不圖羅鉗吉網外世更有此鏡新磨爾豈不聞
周公亦有影獨行獨寢無所慙爾若往螿之設官捕汝
如蝗蝻爾又不聞仲尼亦有影弟子謹避不敢履爾若
往螿之子路石磐壓汝死爾何不游鏡殿中媚娘含笑

看昌宗千影百影任爾飽苦口直與梁公同達摩面壁
坐兀兀其心已死不復活爾往吸彼壁間影此功不減
馬祖喝我本飯顆山頭太瘦生那能肥白如陳平骨人
不足供咀嚼况此瘦影何勞爭我爲爾言爾應省爾何
張目如蚱蜢爲爾作歌三太息嗟爾么麼伎倆未全逞
不見薏苡可與明珠同沙糖可與黃金等古來宵小中
傷人何必其人果有影

孫蓮叔贈雲霧茶賦謝

浮上仙人舊游處至今萬丈青芙蓉天梯石棧繚以曲
非雲非霧常濛濛朝聞木客嘯其上夜見山精游其中

人間煙火所不到雲噴霧泄皆神功一朝抽出珠琲璫
石罅青翠如蒲茸茶丁欲采不得路導以鶴子從猿公
緣槿縋索僅得上十人提筐九則空由來神物不多有
何怪價與黃金同故人贈我滿一籠雲花霧葉猶惺忪
嗟余塵容積斗許如墮五濁神懵懵得此月團三百片
快哉兩腋來清風茶銚手拭翻自愧近來面目仍吳蒙

磔鼠行

一舉手一鼠死咄咄書生勇至此一鼠死羣鼠號如訴
無罪聲嘈嘈鼠爾來前吾告汝故爾爲禮鼠吾不汝怒
爾爲隱鼠吾不汝顧何爲乎人我寢升我牀顛到我衣

裳黠鼠之貪已無厭蹊鼠之毒尤難防驕驪與騏驎捕
爾非所長孟賁自言勇搏爾反見傷鼠母前行鼠子後
卻行仄行如康莊噫嘻爾亦幸未逢張湯吾聞蹶鼠一
跳數尺高無端一蹶埋蓬蒿又聞躡鼠自恃有五技一
朝技盡竟安恃碩鼠碩鼠聽我歌爾曹伎倆徒么麼啾
啾唧唧將如何海外鼠王國邈乎竟何許何不返爾所
乃向橐中處縱令白老睡不知自有銅丸來逐汝如不
信視此鼠

黃氏子詩

歙縣黃氏子名崇信九歲能詩文或試令屬對曰小

時了了卽應聲曰元箸超超其慧可見佗日所至未
可量也因爲賦此

無雙今又屬黃童纔賦高軒句便工夙慧居然珠在手
嬌姿想見玉臨風小時了了真堪羨元箸超超本不同
吳下阿蒙翻自媿近來頭腦大冬烘

鑒物篇

勿矜爾雄而耻人伍劉累豢龍梁鴛養虎勿倚人勢而
向人驕唐公房鼠燕真人貓朱門勿榮白屋勿醜鷓鴣
生鷗熊虎產狗同我勿親異我勿疎鼫鼠啖鼠鱉魚食
魚情受之天勿強其肖鸚鵡自啼鵲鷄自笑性之所適

勿求其兼杜鵑常北鷓鴣常南世界大千孰知其極雀
蛤迭遷蛇蛙互食世途反覆孰知其情狐爲女狀狼作
兒聲人之所賤忘其異衆蠻虺侶龍駿驥侶鳳人之所
貴或亦恒流麒麟牛尾鳳皇雞頭謂莫予毒必有所蹙
蜮聞鷲沈虎見蝟伏謂不足數乃亦有工猥狗知雨乾
鵲知風不必同巢不必同穴打鴨驚鴛燒黿致鼈毋恃
頭角毋詡爪牙螭蚌鬪虎螂蛆食蛇宇宙大矣不見有
餘有火中鼠有雪中蛆吾生寄耳何所不足蜺居鹿耳
蟪藏龜殼雖有百年百年可嗟中州一蝸滄海一蝦亦
有千秋千秋誰覺麝護其臍犀埋其角是以達人大小

都忘蠹可稱虎蠅可名羊是以至人物我各適鼻沒鷺
浮蚤乾蟲溼

鬼

曲折迴廊獨自行微聞太息夜三更月明長嘯無人見
風過血腥何處生白日簾櫳惟鼠迹黃昏院落有龙聲
漫漫莫道何時旦聽取晨鐘一杵鳴

怪

世間萬事總離奇博得流傳信復疑市上異人初過處
山中古佛忽靈時風雷慘淡五更雨榛莽荒蕪三尺碑
說與老儒渾不解諸公無乃妄言之

已酉春日寄王甫兄廣西

六千里外作征人五管雲山一葉身門戶艱難都仗婦
晨昏安否各思親敢云長揖能增重時兄客鄭夢白撫部幕中或者
遨遊勝守貧小錄驂鸞須手訂莫虛眼界此番新

光陰俱向客中過賸有閒門鎖薜蘿夢裏歸來輸我近
人間閱歷讓君多讀書歲月貧猶未作客生涯老奈何
莽莽蒼梧空悵望幾時聽雨共東坡

蓮叔招看牡丹即席有作

名士傾城兩庶幾不先桃李鬪芳菲來從天上眾香國
披得人間一品衣林下山公原自貴楊家妃子本來肥

自憐寒瘦同郊島也戀穠芳未忍歸

又成一絕句

管領春風豈等閒珊珊仙骨下人間芳心當日分明甚
不媚金輪媚玉環

打標

我讀江南錄競渡日打標借以習水戰不唱迎神謠何
哉新安俗乃與名相淆維四月之望伐鼓鳴笙匏森森
列蘭綺隱隱撞蒲牢良工製巨舸瑤楫而瓊艘羽蓋後
苓麗采纛前飄颻有唐張睢陽正氣干雲霄即今對遺
像凜凜寒生毛叱咤方良走睥睨游光消獨念南與雷

兩君人中豪面受城下箭指斷筵前刀城破等死義大
節皆無撓鬼豈有大小分別真徒勞船中奉唐張睢陽
以逐疫而以雷萬
春為大王南霽雲為
小王神像大小因之斜日落樹杪風起聲蕭蕭一夫負
之走來往如追逃須臾爆竹起驚走山中魑目眩五里
霧耳震三秋濤以此祓不祥何假芻與桃更翦紙五色
慄亂隨風飄黑者黑鴉軍白者白鷺翻或云事近戲無
乃同兒曹書生喜持論不肯前人勦方相箸周禮山鬼
登楚騷張子起漢世鍾馗與唐朝何者非附會未可輕
訾警吾鄉春賽社襍沓連昕宵堂堂戴侯神秩祀陳羊
羔從之葉與柳俎豆同不祧德清于清明日迎總管神
其神有三一戴一葉一柳

均載縣志
而葉無考三社並時出夾道羅旌旄雲車一瞬過火樹
千枝高今我遠行役此會誰相招坐對異鄉樂徒令心
忉忉無才媿奪錦有句還抽毫未堪風土記聊當鄉音
操
哭悼女兒曲一入骨文良淚耳何足悲恨淚不
無為州鄉間有陳氏女許嫁賊中季某女失怙恃依
叔母以居母故索重禮以難季欲居女為奇貨女積
憂成疾至辛丑夏疾加劇女自度不起思一見季自
明而未得間會就醫城中適與季遇相持而哭解香
囊贈季而氣已垂絕季負之行及稻孫樓竟卒亦可

悲也余客新安有從無爲來者言及其事因賦此
淒淒切切有女泣血問女何所悲嗚咽不能說
雖無父女兒自有夫女兒雖無母女兒自有姑昨日媒
氏來索彼一斛珠今日媒氏來索彼紅羅襦非索珠與
襦乃索郎所無噫嘻異哉乃索郎所無朝亦哭暮亦
哭朝哭暮哭一病入骨女兒死耳何足悲所悲郎不知
行行且止女兒入市女兒非入市曰有醫在此女兒
非就醫冀郎一見耳天假之緣郎竟來前郎竟來前女
兒涕泗漣漣解妾香囊繫君衣裳生不得入君之室
死猶得在君之旁妾不勝大願願君無傷風蕭蕭日

冥冥淵魚深匿林鳥悲鳴女兒行不成步語不成聲
蛩距虛負之而行嗚呼今日何日得君負之而行女兒
雖死死賢於生我聞此事爲作此詩敬告儒林丈人
勿以苛禮責女兒女兒之志良可悲嗚呼女兒之志良
可悲敬告儒林丈人勿以苛禮責女兒

兩當軒集有何事不可爲詠史二首卽效其體
何事不可爲乃妄學堯舜功高國愈危權重主亦震九
錫書方來三讓表已定天子願避賢羣公競勸進太常
具禮儀太史奏瑞應於是高築壇威儀一何盛曰皇帝
臣某謹以元牡請神器無久曠天位宜早正臣敢執小

節而久稽大命乃召故君來朕命爾其聽庸建爾上公
往哉罔勿敬無何讓王薨仍以天子贈車駕自臨送震
悼若弗勝嗚呼將誰欺欺天天不信唐宋均爾爾吾無
責魏晉

何事不可爲乃妄學孔孟雕蟲楊子雲晚年忽自病太
玄擬周易法言擬魯論遂令文中子妄以聖自任門亦
四科分經亦六藝定黎丘僞可疑荆楚僭孰甚要是古
人拙事事若符印後世則不然其技又有進鑿空講理
學聚徒談性命漢唐盡吐棄佛老或借徑就中又區別
閩學與德性小儒聞而慕支派日以盛語錄繁於經道

統尊於聖嗚呼諸先生所學非不正當思漆雕開吾斯
未能信

予來新安問字諸君日有至者而方言不同相對
無語戲作此詩

周客不知鼠楚人不識虎越客端宜作越吟魯人止可
鳴魯鼓縱煩宮女正僂音偏有參軍愛蠻府須知齊傅
教齊言不若楚歌配楚舞無如作客來異鄉未免相對
成僮父人疑王導何乃淘我訝左慈遽如許欲言未言
先囁嚅侶解不解兩齟齬不如一笑付胡盧何必多言
徒謔謔君不見公羊作傳語則齊淮南箸書音則楚猶

勝一聲稜等登口作箏聲不成語

汪紫卿芳慶為余畫一便面柳陰之下因山為屋

一人危坐其中旁則積書如堵噫此境也非余所深願而不得者邪因為長調以酬其意兼述所懷

傳一卷書勝千駟擁萬卷書如百城吾曹例有愛書癖

謂吾獨否非人情家貧棄書逐衣食目有所觸心怛怛

吾兄亦復有同嗜每遇書買囊為傾然脂暝寫數十卷

上者兩漢下則明書成畱與蠹魚飽短衣楚製萬里行

提書一袂付吾校誰其作者悅與宏王甫兄將之粵西以荀悅袁宏兩漢

紀屬余而我來作新安客羔裯筍席今三更浮名浪竊校定

如畫餅不足齒數真一儉諸君見我忝鄉賦疑於文字

三折肱拜手稽首稱弟子問其年齒吾所兄為貧而仕

古且有况乃僅竊師儒名二十一史東高閣且與諸子

談朱程虛字律令吾粗曉設有謬誤能彈抨讀故人書

一太息無乃舍己為人耕馬燕香今觀君畫再太息此

吾素志何時成吾本烏中山下住尚有先世雙柴荆三

硬蘆圩一稜地吾鄉地以若干畝為一圩余厥性頗宜家薄田數畝皆三硬蘆圩也

長腰杭惜乎所居固湫隘田亦未足供粢盛佗年買田

更築室旁或益以樓三楹環植楊柳如君畫亦或不論

松與檉鑿池引水種菱芡襍以鶩鴨池中盈牛鬪豕笠

固細事苟有隙地皆宜營四時甘旨既無缺不速客至
兼可烹奴使耕田婢使織童子一二供使令更蒔花木
及竹石風味庶比田家清亭榭具體亦已足小橋當使
南北橫春秋佳日奉母出弱女扶杖嬌兒迎主人謝事
亦謝客冬衣鹿裘夏裸程終朝閉戶坐一室惟聞戢戢
牙籤聲買書但不買語錄餘者皆可充書棚爾時吾兄
所手寫或者高與牀頭平弟兄白首相對讀旁人不識
恹且驚書巢老死亦無恨死便埋我先人塋再觀此畫
定一笑君有先見如楛生吾言及此三太息長抱鄙願
徒硜硜賣文日禿兔豪一家中依舊空瓶罌青山自在

不須買草堂資亦良非輕書空咄咄竟何益徒使鄉夢
宵來縈已矣置此勿復道流行坎止吾無爭

百歲婦詩

休甯上草市孫漢昭之妻生於乾隆己巳至道光戊
申壽百歲七月十四日其生日也至八月而卒家惟
一孫又甚貧遂湮沒不著余甚惜焉因紀以詩
白髮青裙婦蓬門老此身壽難兼福命死已過生辰日
月

三朝永蠶鹽百歲貧瑤京歸去後誰爲勒貞珉

女蘿行

夫搖比翼之扇夏日分涼臥同功之縣冬宵共暖斯
固倡隨之樂抑亦胖合之常若乃已寡婦之懷清齊
嬰兒之不嫁則已哀同黃鵠孤比青鸞然一則天上
媼媼本來有偶一則日南野女原是無夫從未有青
廬一面便了前緣而白髮孤燈仍稱偕老者也乃有
金屋名姝玉臺麗質春在汪倫之宅生共桃花雪深
明道之門來吟柳絮方謂赤繩繫就定諧伉儷之歡
誰知黃土搏來竟遇冥頑之物夫感終風而隕涕賦
芣苢而傷心此情雖人所難堪此恨猶世所時有乃
啞如豫讓既痼疾之難瘳而狂豈接輿又披猖之加

甚此則性非鹿豕難與同游嫁逐犬雞亦爲較勝者
矣然而女貞自矢婦順無違三十年怨耦方長不受
未亡之號九十月春光太短已甘獨活之名小姑元
是無郎使君居然有婦迨狂夫之柳望秋先零而貞
女之枝經冬尙茂守我閉房之記報君同穴之詩烏
呼其可感矣亦可敬矣名雖高于漆室事難達于蘭
臺因賦短章以存苦節女而不婦人休疑爲宋國伯
姬色卽是空我請證之維摩天女

青青女蘿枝乃附荆與棘女蘿雖無知女兒三太息妾
家慧山側日飲慧山泉梁谿清見底照妾雙嬋娟一朝

梁谿水送人去千里去去將何之千山萬山裏千山萬
山裏云是新安江女子固有行所悲在異邦異邦雖可
悲高門原不辱聘我明珠千先以雙白玉入門笙謠起
綺席猶未收坐客皆珠履騎奴盡綠襪入室屏幃開麝
茵鋪地密傅母玉搔頭侍兒金屈膝再拜見舅姑舅姑
顏色和新安江千里新婦勞如何回頭見娣姒娣姒各
色喜不必問采伴儂家皆築里斜睨兒夫兒夫麗且
都盛年十七八白哲未有須魚質被龍文問魚魚不識
癡骨裏妍皮好醜誰能測朝聞人有言兒夫生而瘖竟
如無舌蟲不能成聲音暮聞人有言兒夫生而癡飢飽

且不識菽麥安能知新婦始猶疑怪事那有此昨者見
堂前翩翩佳公子新婦繼乃悲淚下如綆縻不恨妾夫
惡但恨生不諧青青女蘿枝乃附荆與棘女蘿雖無知
女兒三太息自此洗紅妝自此守空房連理三十載妾
身是女郎東家亦娶婦娶婦秋月圓秋月照帷闥共臥
蛩蛩蠶西家亦娶婦娶婦春風滿春風窺簾櫳同服黃
昏散女蘿附荆棘荆棘誰能親嫁女與狂夫百歲如路
人女蘿附荆棘終與荆棘守嫁女與狂夫原不狂夫負
秋月與春風年年自不同惟有一心人亮不渝始終始
終苟不渝何必共牀第誰與知妾心惟有梁谿水

蓮叔以詠古詩見示戲和四首

滄海君椎

始皇入海求蓬萊蓬萊仙人安在哉徐福一去不復返
滄海君獻力士椎異哉此力士非鬼復非仙是何名姓
終無傳當日海上鞭石石流血或卽此椎之力而非真
有神人鞭一椎擊三秦動十日索天下聳海內始知秦
可擊陳項紛紛起吠隴祖龍不死膽亦破不久便葬驪
山冢乃歎子房此舉非無功後人莫將成敗論智勇

禰正平鼓

大兒孔文舉小兒楊德祖平生眼底空無人乃爲老瞞

一擊鼓鼓聲一擊風蕭蕭坐中賓客寒生毛老瞞顏色
慘不樂鼓吏擊鼓聲愈高惜哉此鼓僅向鄴中擊請看
佗日東風燒赤壁倘留此老在南軍戰鼓一聲飛霹靂
幸哉此鼓猶在建安年請看佗年寂寞西陵田倘煩此
老更一擊能無白骨寒重泉

李長吉錦囊

可憐齷齪子手提十囊五囊錢重若金印腰間懸一朝
囊破錢難穿不若吾輩囊中詩一囊詩抵千牟尼提囊
示人人不識但驚腹大如鴟夷嗚呼有唐三百載只有
詩堪愛劉郎珍惜一首詩竟有土囊壓其背當日曲江

諸少年例將皮袋隨身佩何如李家奚奴背上小錦囊
足抵人間多少金魚銀魚袋寄語千載學詩人莫與李
義山衣一例掃摺碎

樂昌公主鏡

瓊樹朝朝璧月暮君王正醉臺城路是何女子獨聰明
已知家國同朝露臨春結綺爭繁華興亡轉轂徒咨嗟
試問青谿橋下水何如玉樹庭中花鏡兮鏡兮儂與汝
爲命分得菱花剛半柄誰知蕭史竟相逢一笑重完當
日鏡鏡雖完璧已破倘逢金谷墜樓人應媿鏡中顏色
宛鏡雖破人尙完可憐花蓋入宮後空向張仙圖上看

古意

馬如龍車如水將安之入吳市吳市輸一錢便得看西
子一人一錢千人千西子看殺誰云妍請君細看西子
面一入吳宮難得見

寓齋題壁

偶然投足莫非緣坐對明窗况四年庭下雖無書帶草
墨池餘瀋滿階前
土音雖解半難通相對都成囁嚅翁慙媿方言吾未箸
虛勞載酒過楊雄
何處新翻團扇歌金星入命近來多門生頗亦能吹笛

只惜吾非馬伏波

豈果神鍼出夜來筆花都到五更開經營慘淡燈光小
不是仙才是鬼才

墨出汪紫卿出所藏木紙見示其實木也而薄如紙可
以受墨但不能卷耳云出東洋因乞其一而紀以

詩

紙非紙木非木此木無乃輪扁斲不然安得如紙薄其
廣四寸長踰尺其質雖脆色如玉不堪舒卷入詩筒亦
難裝潢成畫軸惟堪墨汁塗淋漓或其筆鋒峙卓犖形
製大小初無殊紋理縱橫尙相屬試問紙官固弗知卽

徵紙譜亦未錄其來遠自東洋東定與高麗紙同蓄吾
聞蔡侯始造紙樹膚麻頭非一族後人有意求新奇亦
或從宜更從俗吳人以繭楚以楮蜀人以麻閩以竹要
皆剝膚存其液麤者使精生者熟彭彭魄魄水碓舂丁
丁董董布囊漉功從一寸二寸成力或千椎萬椎築何
如此紙出天然真乃不雕又不琢魯人削固無其勻楚
匠匏亦憂其縮吾儕日向故紙鑽以木爲紙見者孰乞
君一紙已足榮何必參軍滿百幅但慙木筆不開花孤
負銀光照吾目

紫卿又以兩燭見示乃明代物也亦賦一詩

不見前代人乃見前代燭其壽三百年望之已如木方
其造此時豈料至今畜成毀竟誰司堅牢惟爾獨膏雖
屯而光炷乃老不禿質細工雕鏤形方露圭角已免劫
灰紅莫學聖火綠不以明自煎千載定可卜

閉戶

閉戶先生倦出游惟將筆墨破羈愁隨人作計何妨嬾
無佛稱尊亦可羞公擇書纔學鸚鵡庭堅詩恐類蝘蚌
曹蜍李志皆千古莫問人間弟幾流

伐蛟行

周官壺涿氏實掌除水蟲水蟲非一族而蛟尤其雄擊

鼓投石神不死更以牡槵貫象齒古人慮患何其周月
令伐蛟亦如此小儒讀之付一笑直謂古人遊戲耳何
怪官吏多因循酒肉醉飽安知民輒云深山絕壑人不
到雖有蛟窟無從詢我來新安問田叟蛟之所生處處
有以龍爲父雉爲母遺種入地數千尺草木不生雪不
受惜乎強弓毒矢民間無不然剗割如屠狗一朝頭角
養已成飛上半天作龍吼今年久雨無時乾老蛟不冑
泥中蟠霹靂一聲裂山出遂令平地生驚湍吁噫乎老
蛟作計亦太劣何不山中守爾穴驅駕雷霆欲出山一
遇海潮化爲血

山中之蛟不耐鹹水
與海潮遇往往多死

偶感

自春徂夏雨還風芳信都歸冷淡中無奈名花心不死
明知風雨也須紅

閩浙中大水

憶昔歲辛丑大雪沒至肘老翁八九十驚詫得未有天
公好出奇無獨必有偶今年兩月雨海若不敢受遂令
平地水高可濡人首頗聞新安民水患固所狃老蛟一
掉尾萬室掃如帚游子見而歎猶謂故鄉否家書昨日
至不覺噤吾口書中何所云但道水太陡我家臨平湖
地不逾一畝誰知陋室中已可置敞筍襪襪鷺登堂撥

刺魚窺牖家人避它所故宅誰扞振一僕一老嫗權拜
官畱守空堂網蠅蝻汗泥定一斗區區家室計此猶在
所後顧念水漫漫已徧浙左右田疇旣被淹室廬亦見
蹂年荒穀價高盜賊挺而走已憂生計艱更恐癘氣厚
敬問諸巨公誰是迴瀾手我讀左氏書經義細分割一
尺雪爲大三日雨爲久若在今日觀此殊未爲咎吾年
未三十所見過魯叟白首誥生平卽此可自負

六月三日內子三十初度寄詩爲壽

蓬門寂寞酒誰沽自覺新詩未可無一歲遲生原外弟
十年苦守尙窮儒清閒轉得貧中味憔悴遙憐病後軀

只有嬌兒偏解事手攜弟妹拜瞿瑜
誰家夫婿擅風流寶馬香車作勝游我爲不才長落寞
卿緣何事亦窮愁屋嫌租貴謀移徙奴怨傭微聽去留
堂上親衰兒輩小可知晨夕費綢繆
莫嫌門戶費支撐紙閣蘆簾氣味清配我書香皆福分
傲人銅臭是科名雖貧未識糟糠味因別彌增伉儷情
一事流傳三黨徧膝前兒女總聰明
不向紅窗共舉杯客中此夕倍低徊酒無可祝將詩祝
身未能回有夢回少小絲蘿聯玉鏡幾時聲價重金臺
明年我亦剛三十曾否春風得意來

樂府體四章記江浙大水

水災歎

天公憤憤那有此竟遣十一龍治水雨師又不避甲子
遂令乘船可入市正月十一日遇辰爲十一龍治水主
水災自宋以來有此說夏兩甲子乘
船入市亦古諺也今歲皆驗君不見東南七千里田廬盡化爲汙渠
又不見黃河之水天上來一怒欲灌淮與徐嗚呼噫嘻
民其魚

賑饑行

小口三大口六六文錢一合粟炊之爲糜不盈一掬何
况小口又減半雖易糠粃且未足昔時富戶今亦貧何

人爲具黔敖粥西風策策吹茅檐大口小口同聲哭
不生不死流民來流民既來何時回欲歸不可田汙萊
欲畱不得官吏催今日州明日府千風萬雨不借一廡
生者前行死者臭腐吁嗟乎流民何處是樂土

米貴歌

錢六千米一石米一斗錢六百借問窮檐民何以度朝
夕市中米價日日增米不論斗止論升我欲辟穀嗟未
曾一飽之樂何可憑且寫魯公食粥帖歸問妻孥能不
能

余客新安與孫蓮叔交最深明年春將入都應禮
部試因賦詩爲別

人生半而莫非緣何況論交近十年燈火正尋文字契
風霜又到別離天堅畱後約煩縣榻遙指前程盼箸鞭
卻恐長安居不易未行先贈辦裝錢
不才十載困風塵媿說名場閱歷身意氣自知難比昔
文章敢謂尙如人破荒科第殊非易啗肉神仙豈是真
小草本來無遠志聊酬良友與慈親
旅食新安四載餘微名贈我勝瓊琚
詩成集問字門前客駐車
蟲侶壓油雖自苦士如畫餅不嫌虛

吾儕最是狂難及莫向悠悠計毀譽
卽今千里赴金臺敢謂游燕是郭隗有幸或能登一第
無成仍可訂重來青雲路遠雖難定白首盟堅總不灰
此去升沈何必問終須爲我洗尊罍
蓮叔將余所致書札裝成二冊聞之甚媿
寄書不獨報平安無限清狂在筆端一月須糊一斗麩
綠珠盆內幾曾乾
收拾都歸一卷裝只慙筆墨太頽唐書成總似恩恩寫
不識荆公有底忙

春在堂詩編一

庚癸編

春在堂詩編二

德清俞樾

庚戌春偕王甫兄北上覆舟于青楊浦詩以紀事

其地距丹陽七里

正月癸丑天平明扁舟曉發毘陵城孟婆方便助吾力
片帆高與浮雲平迅若巨魚縱大壑輕於廖廓翔鷓鴣
誰料危機卽此伏性命幾與蛟龍爭上流一舟渺如葉
砉然觸舟舟微橫猶謂鄒不與楚敵彼或可慮吾無驚
庸知造物有深意危者使平易者傾風力注帆帆勢側
柁不能制篙難撐天旋地轉此一瞬使我日眩心怦怦

詩三

猶幸相將登彼岸未至竟與鷗鳧盟遙見吾僕自水出
豈惟濯足兼濯纓舟子予立泥淖更有童穉啼伊嚶
是時風雨又作惡那免寒栗肌膚生嗟我遠遊竟何事
所爲祇此區區名奔車覆舟古所慎何以此險吾俱攬
憶昔車償已至再乙巳入都時事今茲水戾尤非輕姑轉危語
作壯語平生履險如夷庚分風劈流巨靈手沉舟破釜
項籍兵寄語孟婆更助力使煩送我遊蓬瀛

穀城山中訪黃石公祠不得

帝遣五老遊人間一入藍田化爲玉始而趙璧後秦璽
神物流傳無乃辱不如此老化爲石恥以譁囂悅人目

偶然遊戲遇子房興漢亡秦一編足韜精歛采穀城山
坐看秦璽出函谷我來驅車行山石走犖确神仙富貴
兩茫茫徒向風塵緬遺躅

漫河集遇風

彭彭魄魄春雷鳴渾渾沌沌秋潮生佗佗籍籍虎豹鬪
淫淫裔裔蛟龍爭噫嘻風力猛至此而我驅車適與風
相迎頗疑車輪昨夜生四角不然何以千搖萬兀車難
行老僕凌兢凍欲倒疲驟局促噤不聲我亦閉帷學新
婦猶來飄搖吹我雙冠纓回憶故園好風日綠楊樹樹
聞啼鶯花氣濃薰袷衣暖芹泥軟藉芒鞋輕何爲一鞭

走燕趙塵沙眯目幾成盲不知風伯竟何怒自朝至暮
猶未平亟投逆旅避其銳且喜雞黍盤中盛牛溲馬勃
無不有禦寒聊盡酒一觥臥聽風聲獵獵猶未息僕夫
又報東方明

趙北河渡十二連橋

南垂北際認蒼茫轉覺煙波似故鄉一水略清燕趙氣
重關曾劃宋遼疆鴨頭浪小漁舟穩雁齒橋平客路長
慙媿元龍湖海士也來車鐸走鄆當

入都

僕僕長途敢憚勞風塵且喜換征袍龍髯已遠攀何及

駿骨無憑價不高方朔空囊難索米禰衡名刺易生毛
狗屠市上如相問只有悲歌氣尚豪

謁謝文節祠

首陽薇蕨老高餓又先生蟲臂身原寄鴻毛死甯輕起
兵虛翟義賣卜學君平南八何曾屈皇天眼自明
瀛國歸朝口崖山致命秋空存三寸舌莫挽五更頭衰
骨陳情上書曾卻聘修不因親尚在朱鳥久同游
富貴畱承旨風流趙子昂如何忘節義知否有倫常孝
女碑三尺孤臣淚萬行由來名教重何敢忝冠裳
冰霜無折挫香火有因緣碧血哀丘畔青燈古佛前

詩三
三
憫忠
寺後
墓碑仍署宋廟貌任留燕我到
摳衣謁靈風起肅
然

乾隆重勒石鼓歌

我入成均觀石鼓石鼓彭亨手可撫從甲至癸數盈十
自東徂西度各五摩挲再四歎神物有客爲言此非古
此鼓勒自乾隆年
御碑突兀樹於廡我聞斯語尤屏營再拜而觀敢莽鹵
唐時石鼓出陳倉殘缺幾將成柱礎表章始自韋蘇州
歌詠又傳韓吏部自元大德移燕都五百餘年留此所
小儒眼小小於豆疑秦疑魏騰其輔煌煌

聖論薄雲霄始爲千秋破龔瞽自來神物有廢興或棄
泥塗或天府隋世已毀無射鐘元代猶存劈正斧斯鼓
得逢

聖人世舊者重新缺者補倘令坡老生我

朝欲讀何須手畫肚下士禱昧何所知肅觀其旁首爲
俯惟

聖雖述亦兼作是器雖文亦寓武車攻吉日中興詩豈
與尋常鐘鼎伍

禮闈揭曉口占四十字

三十初通籍微名敢怨遲所嗟登第日不逮過庭時燈

火仍兄共門閩慰母思長安春有信早報故園知

五月初三日

勤政殿引

見紀

恩一首

紅雲深處冕旒尊魚貫同趨

如意門紫禁分行森玉立

丹毫圓轉透珠痕

凡與館選者
殊筆作圈

頭銜已借冰壺冷手澤

猶存鐵硯温記得先臣遺語在畱將科第付兒孫

先祖南莊

府君年逾七十以明經終人或惜之輒怡然曰
語此以貽子孫不更優乎見先君所撰家傳

十九日初入翰林院恭紀

北御河邊一水清曉隨鷓鴣集蓬瀛雲中丹詔

天申命殿上緇帷聖大成

是日宣
并謁

先聖

簪筆行將從太

史執經初學拜先生

大教習杜芝農相國福元
修侍郎均于是日到館

非才濫

與清華選媿說仙曹已隸名

餓夫墓

餓夫姓彭氏名之燦字了凡明季蠡縣諸生也甲申

後棄諸生入輝縣蘇門山餓死孫登嘯臺下孫夏峰

先生題其墓曰餓夫墓庚戌歲有以其事實寄京師

索題詩者因賦此

元蟬潔而饑蜚螂穢而飽苟念嗔蹴羞猶謂餓死小何
况劫火人間燒故宮離黍愁蕭條何地可挂箕山瓢何
路可吹吳門簫侏儒侏儒亦孔醜爾曹飽死竟何有夷
齊結隊下山中巢許爭先迎馬首眼前突兀惟有孫登
之高臺嵇康死後無人來芒鞋竹杖偶此過劃然長嘯
山爲開千仞山三尺土餓夫之骨香千古誰其題者孫
徵君至今字字龍蛇舞我欲拜其墓惜無介山田我欲
弔其魂惜無雍門絃但覺餓夫赫然在生氣凜凜干雲
天嗚呼先生竟以一餓傳

八月二十二日請假南旋口占二律

金爵觚棱入望遙一鞭南下路迢迢秀才官冷奴無勢
薄笨車輕馬不驕清俸未能供菽水虛名那足傲漁樵
止因生小江湖慣話到煙波興便饒
十年辛苦困名場韞線微才本不長
聖代優容無棄物羣公謬愛到文章敢期著述畱東觀
聊取科名慰北堂慙媿相如仍四壁虛將詞賦擬長楊
阜河阻雨易車而舟成四十字記之
車輪竟生角草草又登舟一夜雨淋腦連朝風打頭歸
程剛共雁生計總輸鷗何日煙波裏全家泛宅游

松江

言三
六
狎鷗亭畔足清娛我亦扁舟向此租自昔文章推二陸
于今財賦冠三吳空江有雪鱸魚冷同調無人鶴唳孤
慙愧塵容徒碌碌未堪蹤跡寄菰蒲

黃浦

客路經黃浦推窗試一觀晴光浮水淡海氣逼天寒蓬
背留殘雪船唇鬪怒瀾江湖吾所樂止欠釣魚竿

內子偶作梅花詩云耐得人間雪與霜百花頭上
爾先香清風自有神仙骨冷豔偏宜到玉堂余喜
而和之

庭院無塵夜有霜風來不是等閒香寒宵同作羅浮夢

絕勝東坡在雪堂

三女堆

在海甯長安鎮覺皇寺
後乃吳大帝弟三女墓

吳宮花草付荒煙幸此佳城築尙堅千古漫矜銅雀瓦
一抔猶贖赤烏甄休嫌猪子難爲配且喜蠟姬與竝傳
畢竟江東兒女好劉家豚犬不堪憐

咸豐辛亥將至新安訪諸故人發錢唐江口占

浮生不定似飛蓬又挂之江一席風游子出門殊惘惘
老僧托鉢柰空空青山太熟詩無料白日難消睡有功
遙想新安諸舊侶幾回相望暮雲中

登新安郡城斗山亭作

詩三

七

七年來作新安客今日始至新安城城中有山山曰斗
山上有閣以斗名我攜游屐偶登此盡收勝概歸簷楹
兩城環環蟻垤小萬瓦簇簇蜂窠平一江如練走鳥下
渺若杯水堂坳傾翻怪昨者此呼渡何爲波浪使我驚
對面黃山隱復見似聞客至來相迎舉手敬向山靈謝
青鞵布韞猶未成興闕游倦下山去流泉濯足風吹纓
回頭仰望渺何處但有雲氣涵空明

大風雨過五里欄杆

山石犖确一綫寬其上壁立千峰巒俯臨百仞下無地
行人未過心先寒此塗雖畏行難已爰築石欄長五里

五里欄杆以此名上達郡城下巖市地名籃輿昇我行山
均舉頭不覺青天高隘道僅如蜀左擔危巖何滅秦函
峭天公有意與我戲風風雨雨破空至書生張目坐咤
叱老蛟欲出又驚避我聞武穆昔此過摩崖作字字擘
窠以石爲紙戈爲筆筆鋒橫掃青嵯峨石上有山高水
長四字相傳爲
岳忠武書至今英氣足千古山中不敢生豺虎我亦題詩巖
石間山靈莫笑書生懦

幽窈婦墓

徽州府城外有石碑曰嗚呼幽窈婦黃氏之墓訪之
故老言人人殊余謂婦旣含窈而死但使過其墓者

皆知其爲幽寃之婦則婦之寃固已白矣必求其事
轉恐失之辛亥夏日過此因紀以詩聞舊碑漫漶婦
見夢里人重立之亦可異也

負恨竟終古憑誰問九原一碑當孔道萬口訟幽寃但
博人無閒何勞石有言表揚吾豈敢畱此待輜軒

石橋巖

何年天上虹化作山中石遂令兩山間危橋架百尺橋
高百尺上接天其下不鑿天然圓中間一峰隱復見有
如明鏡窺嬋娟石橋下有遠山隱然故亦名美女窺鏡老僧築屋住山腹
一朶奇峰壓僧屋但訝嶙峋雁齒高不知宛轉蛾眉綠

我無仙人凌虛之長趨仰負飛鳥空中招不然振衣登
絕頂請以石筆題其橋

桃天

石橋不可止客請游桃天躡衣走蒙茸雙屨幾爲穿無
端勝境落吾眼四山森立如規圓仰視天形更奇絕有
如一桃空中懸上下凹凸無不肖造物如遣神王鐫剖
而食之惜無巨靈手偷而獻者疑有度索仙因思此境
深藏萬山腹山不自薦誰流傳古人探勝偶至此遂令
千古饒客同流涎所惜佛舍久傾圮屋無片瓦空畱椽
日光穿漏奪吾目未將勝概收其全山靈倘訂後游約

請待此桃一熟三千年

記石橋巖兩泉水

巖石微有罅云是龍涎泉泉水終年涸龍亦愛其涎要待四月分龍日而後龍口有水流濺濺又有四時泉石竅分爲四春夏與秋冬各以其時至我來初夏春已徂夏水正盛春水枯秋冬二竅涓滴無君不見昔日柳子厚造物疑無又疑有卽此兩泉亦難測豈有神物爲之守吾詩聊復紀所見若云格物吾則否

齊雲山紀游

夙慕齊雲名今日乃真到爰從漁亭橋扁舟發清曉沿

溪舴艋輕登嶺籃輿小舁行亂山中曲似羊腸繞仙家有福地精廬頗完好羽士出延客麥飯聊一飽是日飯于洞天福地昔有邈邈翁於此成大道古洞埋骨香石室摹形槁蹤跡雖尙畱名字竟莫考飯飽鼓游興惜乎雨淋腦擔簞游名山山靈幸無笑

雙石巋然立云是頭天門一石危欲墮浮雲爲之根地邈登其三有署天門者三疑可青天捫無端入山腹白日成黃昏但見阿羅漢或坐或則蹲羅漢洞極深邃慄乎難久畱懼爲蛟龍吞去之走山岬有若蝨緣禪飛雨不能入山勢如覆盆惟有巖前瀑閃爍成珠痕有泉水飛灑巖際名真珠簾無怪澗

中水終古無由渾
北方帝真武神靈此焉宅雙鳥遺水中千載化為石明
代構崇基歷年踰數百鑪峯矗其前秀若煙凝碧屏峰
環其後朗若玉生白鐘峰左嵯峨鼓峰右突兀壯哉神
明居夫豈人力闕嗟余亦何幸來此蠟游屐長揖冕旒
前願神恕狂客

贈李子迪

雨後峯巒秀轉加籃輿乘興至君家紅浮席上清明酒
君家以清明日汲水釀酒紅潤可愛綠滿甌中穀雨茶三楚雲煙供吐納
君曾作楚游一庭花木極清華延青生白幽人室
所居軒名延青生白

絕勝朱門觸熱搥

四十年華鬢未衰謝庭珠玉好栽培且將書味從頭領
會見科名接踵來選勝最宜鄰白嶽
余齊雲之游君為主人蜚聲
定卜滿金臺慙余秃盡江郎筆有負論文酒一杯
君子弟半

從余游并擬令隨余入都

四月十六日新安諸故人與及門諸子為余補作

三十生辰即席賦謝

去年茗土逢生日風雪扁舟獨自眠
余去年泛舟茗雪適逢生日何
意諸君憐故我翻教一醉補今年已遭偏露難稱慶偶
竊微名未是仙但感光陰如逝水尊前那得不流連

言三
麥秋天氣半陰晴且爲諸君盡此觥酒戶從來輪坐客
食單連日議門生清談何必煩絲竹雅集端宜記姓名
白首佗年同話舊雪泥蹤跡最關情

鰕魚

鰕魚生山澗中有四足能緣木食鳥雀不水可活余
考爾雅鰕大者謂之鰕郭璞注曰鰕魚似鮎四足聲
似小兒啼海外西經曰龍魚陵居一曰鰕一曰鼈魚
又北山經曰泱泱之水多人魚其狀如鯀魚四足其
音如嬰兒食之無癡疾蓋卽此魚之類史記司馬相
如傳禹禹鯀鮑徐廣曰鮑一作鰕漢書正作鰕注引

郭璞曰鰕魚也似鮎有四足聲似嬰兒然則鮑也
鰕也皆其異名也寓齋前有畜此者因爲賦之

水蟲謂之魚宜水不宜陸造物喜出奇不許深淵伏是
故鮎與鮑其足各有六鰕魚則虎爪鰕魚則雞足乃歎
物類繁莫恃爾雅熟怪哉庭除間何處得此族有足竟
如鮎無鱗又非鰕夜靜聞其啼聲類小兒哭云自山澗
生飢極輒緣木巧借口中水靜待鳥來啄鳥渴就之飲
誰料入其腹書生喜臆斷謂此乃鮎屬又或謂之鰕上
林賦曾讀又或謂之鮑異字史公錄一笑語主人魚乃
我所欲何不烹爲鮑否則乾爲鱠使我得染指當勝雞

與鶩既而復自笑吾意殊碌碌海上有鯨鯢京觀未及
築矧此池沼物區區安足戮不如姑置之仍命校人畜

金華

秋色斜陽裏先人舊挂蓬先人到金華詩云人家
秋色裏城郭夕陽中遺編
來此讀風景與之同江闊橋能跨城低塔轉雄停橈無
限意不僅感飄蓬

繆孝子詩

繆孝子名聖元仁和之臨平人母病斷一指烹而進
之母竟不起孝子大慟創裂尋死余時適居臨平聞
其事因紀以詩

繆孝子家臨平有父父早世有母守節如陶嬰孝子貧
不具甘旨孝子愚不讀書史樸茂美意人不知竊竊羣
疑非孝子無何母病病且危孝子不哭心傷悲無錢不
辦湯與藥刲肝斷臂孰非吾分所當爲抽刀斷指手不
縮裂帛封創眉不蹙烹而進阿母母不知爲子之肉一
引而盡甘如飴私冀母命從此續誰知母命竟不續一
慟從之登鬼籙嗚呼繆孝子其意殊堪傷天性日以薄
是亦名教光韓子鄩人對母乃拘其常請以此歌激發
末俗之天良

奚虛白先生疑行年八十寄詩爲壽

自從樊榭此登樓樓畔雙榆綠更稠先生所居榆蔭樓乃樊榭故居天
爲先生留小築人非名士不同游花間醉客烏程酒雲
外尋僧茗雪舟望重東南年八十詩家此福有誰修
先人生小菰城住每到城南必訪君消夏同邀金蓋月
尋秋共泛玉湖雲樓中舊榻塵猶積篋內新詩藁未焚
今日典型尊老輩敢云交紀又交羣

鄭節母行

節母鄭氏吳江人年十九歸秀水楊君錫圭甫三載
楊君因蹶折臂庸醫燕炭炙之中火毒咯血死有子
早夭母撫嗣子成立爲娶婦生孫二而嗣子與婦又

卒母又撫二孫嘗曰吾育頭蠶不成更有二蠶矣數
十年辛苦備至其長孫象濟所撰行述甚詳余同年
戚英甫其戚也徵詩與余因賦此

殉夫易撫孤難何況子死又撫孫數十年中歷盡冰霜
寒嗚呼節母之力能無殫節母始入門妙得尊章喜
婉變相其夫井臼皆親理無何所天病病且終不起折
臂三公今已矣誓將一命從夫死尊章泣相謂柰此
嗣子何瞿然謝不敢涕淚收滂沱願以婦代子白頭二
老同婆娑願以母兼父青燈一卷毋蹉跎養親親令
終教子子成立歸告泉下人吾事亦已畢誰料瓊瑤枝

一朝又蕭瑟賸此兩桐孫纔自孤根茁育罷頭蠶又二
 蠶噫嘻蠶母其何堪 綜計四十年雙眉日日蹙門戶
 我乎支窻窻我乎卜上以奉蒸嘗下以延似續室家風
 雨已飄搖無端倪又遭回祿誰謂茶苦桂則辛辛苦世
 間惟母獨 翩然旌節天上迎峨然綽楔門前旌姑蘇
 臺下十萬家何人不誦節母名節母姓鄭氏所天楊氏
 子家在吳江歸秀水吾為作歌告彤史

壬子元旦無錫舟次試筆

晴光明射舵樓邊元旦欣逢雪霽天爆竹聲催游子起
 屠蘇酒占故人先

時與雲笈同行
年長于余故云

衣冠脫略因為客詩

句推敲算過年輪與玉堂諸老輩裁箋同和早朝篇

金山本在大江中今因沙漲遂可不舟而登亦一

異也以詩紀之

金山浮大江厥名曰浮玉山神厭水居自江徙之陸沙
 痕一望平水勢半江縮遂令咫尺間攀援即山麓我昔
 此維舟雪深阻游躅蹉跎八寒暑又向江干宿遂攜游
 屐登同捫

御碑讀江南形勝地一覽盡在目世亂寄安危時平恣
 游矚往來使節多迎送僧鞋熟蹲鴟踞殿紅鳳翥負碑
 綠吾詩紀所見攬勝殊未足俯仰幸昇平變遷任陵谷

回首望中流姑讓焦山獨

人日發京口疊元旦韻

扁舟侵曉發江邊水面晴光遠接天一棹煙波吾輩在

九衢車馬幾人先聞同館諸君均先已入都招來舊雨皆千里補得

清遊已八年乙巳歲泊金山下未及上今始一游客裏恩恩又人日草堂

待寄少陵篇

鄒縣謁孟子廟

素王不再作夫子起衰周洙泗昇游夏齊梁老奕秋治

無三代盛書有七篇留遺像今瞻拜巖巖孰與儔

千秋尊養意啟聖有專祠殿左有啟聖祠祀鄒國公及端範宣獻夫入均有孟子石

像侍坐五等上公爵三遷慈母儀機絲愆自棄鄰肉示無

欺此日堂隅侍還如勸學時

從游諸弟子分祀廡東西削傳雖難補崇封尙可稽衣

冠留樂正樂正子有像俎豆附昌黎想見門牆盛原堪配仲

尼

曩者驅車過今茲入廟來斷碑從地出有漢碑得之土中已殘缺聖

井自天開有雷震井在大殿庭中鐵樹嶙峋立朱藤曲屈栽平生

私淑意到此幾徘徊

過匡衡故里

名臣故里太荒寒賸有崇碑道左看相業豈能同丙魏

儒家畢竟勝申韓殿廷封事千秋在鄰舍燈光五夜殘
太息後來張禹輩也因經術進朝端

蒼頡墓

蒼史墳前尙有碑當年造字擅神奇六書變體隨秦漢
一畫憑空本伏羲混沌忽開天亦喜文章多禍鬼先悲
要從皇古問真意不使人間獬豸知
結繩以後費經營體製於今幾變更不識何嘗非快活
好奇未免太聰明經書燒後無真本字母傳來半梵聲
我輩雕蟲徒碌碌可憐浪費楮先生

過平原弔趙公子勝

公子風流一世傾千秋遺恨獨長平君臣苟且尊秦帝
宗社安危仗魏兵貪受降書貽實禍謬推將種誤虛聲
當年人物惟無忌不比諸君浪得名

固安弔張茂先

神劍千秋尙未回司空故里已蒿萊太多亦是讀書累
不斷終非定變才宮內甲兵興一夕天邊星象失三台
何如蒹葭鱸魚客長嘯西風歸去來

入都

客路三千次第過無邊春色

帝城多好尋陳迹長安道略洗征塵永定河

渡永定河車陷燕

壘未成猶待築貂裘已做不堪磨一椽擬僦銅駝陌何處間門置雀羅

微雨出廣渠門至天甯寺與諸同年宴集

春風文酒互招延借得城西屋數椽僧舍偷閒剛半日師門問字盡同年雨晴不定隨鳩喚主客無譁任鹿眠院中坐謂座主朱有鹿上醉翁能共樂蒼顏白髮望如仙掖堂侍郎

謝公祠與諸同鄉宴集

謝公祠畔草如茵莫負當筵酒數巡文字清談吾輩事衣冠小集故鄉人壺觴盡興無絲竹兄弟同車有主賓時王甫兄亦與衆賓之側余與同車而往待向禪房看芍藥眼前花木尙餘

春

席散後擬游法源寺不果

與王甫兄至橫街南散步其地皆叢葬處

閒箸芒鞋踏綠莎蕭然風景似巖阿小車得得紅塵少破冢荒荒白骨多幾輩熱場同捉搦吾儕冷趣不銷磨歸來纔向門前立又見高軒次第過

四月二十一日散館引

見授職編修恭紀

九天闔闔鬱崔嵬濟濟千官

闕下來

帝許春光留上苑人將風信候蓬萊幸偕茅許登仙籍

敢共淵雲鬪賦才自古玉堂清要地非徒詞采重蘭臺

孝女行

孝女周氏桐鄉人鐵霞孝廉

士燭

之女也母病刲臂

肉作羹進之竟愈母偶見其臂創固詰之始以實告

且曰兒顛天默禱誓勿令人知願母勿洩也母諾之

遂無知者後歸王生錫璋再舉男皆不育道光戊申

歲以疾卒母撫之大慟始述其事蓋已閱七年矣周

縵雲前輩爲作孝女傳鐵霞以傳徵詩因賦此

慈烏啞啞飛繞屋孝女嗚嗚對天祝有母病垂危醫來

手盡束諸藥雜進皆無功惟有兒身一塊肉抽刀刲臂

臂血流製帛封之不敢哭烹肉進阿母阿母甘如飴霍

然病良已效過參與耆女猶竊喜母不知無端阿母攬

兒臂驚見臂血何淋漓女伏母膝言其私兒誓弗使佗

人知願母弗言憐兒癡已而孝女歸于王王氏舊業傳

青箱孝女以敬相夫子以孝事尊章尊章嘖嘖歎賢婦

謂宜子孫逢吉身康彊脩短誰能知沈疴竟不起母來

撫之慟今日不言吾負爾遂將七年前事語從頭請看

臂上癢痕大如指阿翁聞其事謂是天生至性人難侔

阿姑聞其事深惜吾家祚薄無能畱夫婿聞其事願將

佳傳徧乞名公修下而臧獲聞其事亦不自知涕淚潛

然流嗚呼自從天性漓忠孝雜誠僞孝不求人知乃真
孝之至吾讀孝女傳低徊不能置不見男兒讀書講學
數十年君親借作沽名地

寄孫蓮叔

走也名場閱歷身論交未有似君真項斯直欲逢人說
鮑叔深能知我貧翰墨前盟空鄭重漁樵後約恐因循
遙知別後霞溪水閒殺傳書六六麟霞溪君所居也
浮沈宦海那能知且與諸君十載期寒儉文章難報
國迂疎才略敢匡時若教菽水粗能給便挂衣冠定不
遲佗日版輿奉慈母山中倘許翦茅茨

太師杜文正公輓詞

纔聞霖雨沛南方忽見台星隕大荒遺表但傳憂國事
詔書頻與處家常

君臣終始情無間生死哀榮禮有光敕使親承

天語至細將眠食問高堂

自登政府贊無爲造膝深謀世莫知黃閣共推名父子
綠圖原是

聖人師雖當鵠鼎調羹日還似

龍樓侍學時一十七年資啟沃至今深繫
九重思

飾終恩禮降連翩異數頻邀感九泉珍藥寵頒憐父老
清班特晉為兒賢易名不待臣工議

錫命還居保傅先

聖意徘徊殊未已一尊親自奠靈筵

鯁生才識本鴛頭曾在孫陽一顧閒

庚戌覆試公為闕
卷官越忝弟一

執卷玉堂客問字

樾預館選公
為大敘習謝

恩金殿許隨班

散館日公率庶吉士
於太和殿謝恩

早囊入奏猶無恙

赤烏辭

朝竟不還自為蒼生惜安石非徒絲竹感東山

八月初九日

皇上行夕月禮派翰林六人於西華門送

駕臣樾與焉恭紀

聖主順時行鉅典小臣循分效微誠五籌次第傳呼肅

萬乘森嚴蹕路清鷓鴣排來皆有序驂駟過盡總無聲

鑾輿已遠朝車散共趁斜陽出

鳳城

勝果妙因圖歌

京師廣安門內有慈仁寺乃古雙松寺故址前明改

建者也其西廂懸勝果妙因圖乾隆中傅雯奉

敕以指繪圖中諸佛及羅漢像最小者猶與人柜等屋

凡三楹圖之廣狹稱是洵奇觀也瞻禮之餘歡喜讚
歎而作是詩

松風颯颯肌骨涼老僧導我游西廊道有妙繪中間藏
開門瞥見心傍徨萬億千佛森滿堂如來說法居中央
佛頂隱隱成圓光紺眉藕髮窮微茫諸佛菩薩環兩旁
應貞五百紛成行種種妙相難具詳天龍八部齊騰驤
迦陵之鳥飛且翔龍降虎伏無披猖冥濛雲氣開天闔
諸天護法羅冠裳天魔睽睽不敢狂天女手中花芬芳
我來肅觀生悚惶畫工得此何其良姓名歲月具下方
乾隆丙午夏日長臣雯奉

敕來僧房大叫發墨神飛揚以指代筆指盡張五指化
作獅子王雖有醉象走且僵淋漓揮灑誰能當須臾一
掃千丈强大衆膜拜都焚香但覺紙上生光芒卽今一
燈縣西廂鳥雀不汗鼠不傷安得摹勒千仞岡森然呵
護頰金剛歷千萬劫長輝煌

慈仁寺密變觀音像

毫端建寶刹芥子藏須彌佛法在天地如水無不之偶
借陶旂力妙示莊嚴姿白衣而綠帔纓絡垂參差火土
不相喻變化誰能知

高廟昔臨幸於此鐫銘詞下士未聞道讚歎安所施惟

喜洪鑪內亦有清涼時

仲冬四日移寓南柳巷

寄身安得長房壺老屋三間又此租客裏不嫌家具少
坐中且喜雜賓無開箱先檢新詩本掃室仍安舊茗鑪
所幸對牀還有伴按頭燈火未曾孤

時壬甫
兄同寓

慈親率眷屬入都喜賦

連宵魂夢繞征輪此夕燈前笑語親祿養未充仍菽水
慈容略減為風塵妻孥且耐天涯冷童僕休嫌宦况貧
佗日鄉山如許買全家同享故園春

入朝侍班車中作

星月微茫裏雞人報曉籌晨光瞻

鳳闕寒意襲貂裘禁樹遙難辨霜華冷不流早朝應許

賦此景即蓬洲

癸丑正月二十四日恭謁

慕陵隨同行禮敬紀四律

先帝垂衣治深仁三十年困倉常發粟亭埃總銷煙土
木工俱輟珍奇貢盡捐至今懷

聖德歌舞徧埃垓

宣室傳遺制

橋山率舊儀屢頒

寬大詔不樹

聖神碑

帝極終身慕民懷沒世思謳吟猶未息

陵樹已參差

星燧俄三改韶華又一春祠官開

寢殿

帝子奉明禋

時

命恭親王行禮

黍稷升香遠松楸入

望新

九重嚴恪意原不異

躬親

東觀叨清切

西陵望鬱蔥獲陪

原廟祭如抱鼎湖弓黃瓦瞻雲裏青袍拜雪中

是日大雪在

天靈不遠

仁孝鑿

深宮

渡琉璃河

車聲催夢醒已向石梁過禿樹枯無葉寒流小不波風

前微霰集雲外亂山多未識騎驢客尋詩興若何

驅車渡易水

慷慨悲燕丹不惜黃金買死士誤將秦政

當齊桓白衣送去不復返徒令易水千秋寒嗚呼烏頭
馬角有深痛君臣草草多如夢皇天未許祖龍死滄海
君椎猶不中區區匕首將奚爲藥囊一擲便無用獨憐
枉殺樊將軍一函輕把頭顱送劍術精粗何足云欲劫
欲刺徒紛紛就使秦皇果剗刃未必王翦真收軍自古
存亡由得士匹夫能建千秋勳丹也碌碌胡不聞令人
卻憶昌國君

涿州渡永濟橋

涿州城外水迢迢春入河流凍未消煙裏塔紅經雨洗
雪中山白倩雲描恩恩一飯投茅店碌碌雙輪走石橋

欲向此中尋冷趣不嫌風力太飄蕭

二月八日

皇上臨雍講學派翰林二十員聽講臣懋與焉恭紀

咸豐三年二月上丁

皇上親詣太學行釋菜禮越六日癸未

臨雍講學自王公大臣以及有司百執事自先聖先賢
之裔以至執業之諸生觀光之羣士莘莘焉鱗鱗焉
環集橋門者蓋不可以數計

皇上眷懷舊學命惇郡王致祭於贈太師大學士杜文
正之靈蓋重淵源思耆舊也臣懋幸從載筆之末班

言三
獲觀園橋之盛典宜被謠詠以誌遭逢抑又聞之古
者師出有功告成于學故在詩曰矯矯虎臣在泮獻
馘至我

國家率循是典方今粵西之賊擾及金陵

宵旰之憂實廛於此故於章末及之亦庶幾魯頌之義
也

仲春初八日

皇帝詔臨雍隔歲頒成命先期習禮容宮牆千仞闢冠
佩百僚從柱史威儀肅祠官俎豆恭鸞聲傳噦噦豹尾
護重重輦路香泥細橋門瑞氣濃祥雲呈太甲旭日起

高春濟濟先賢裔巍巍衍聖封親臣冠孔翠
帝子服
團龍有位咸陪從何人不敬共恪依山品級靜聽佩琤
琤朝列無攙越

天顏自肅離庭中陳鹵簿堂下奏笙鏞觀聽人咸屬聰

明

聖獨鍾精言開奧窔高論破愚惓仁敬心惟一中和理

本庸

是日講中庸致中和一節尚書皇天無親克敬惟親四句

玉音宣朗朗璧水瀉溶溶雅化流芹藻羣材獻菲葑茶

筵香馥郁

講畢賜茶

槐市蔭蔥龍胄子叨培植生徒被鑄銘

摩挲周獵碣翁集魯章縫

帝乃倏然念誰爲學者宗丹書懷舊訓赤鳥緬遺蹤鄭
重恩言錫頻繁御祭供推仁原藹藹慕義盡喁喁臣忝
清班附天教盛典逢昔曾衣釋褐今又砌依彤獲覩文
明啟遙知雨露醲膠庠齊鼓篋亭堠徧銷鋒干羽能柔
遠詩書寓折衝虎臣行獻馘賊自歸農會見成功告
重來聽鼓鍾

爲友人題茗溪漁隱圖

日向煙波築釣臺忘機鷗鷺不相猜筍皮笠子瓜皮艇
搖出茗溪深處來
餘不溪邊舊有亭十年拋卻種魚經何當共泛扁舟去

飽喫清明一點青

一點青乃吾鄉魚名也

乞假送親由水道旋里口占二律

三載清班忝玉堂敢拋簪紱事耕桑天涯薄宦門如水
堂上衰親鬢有霜久住魚將遊涸轍暫歸燕只賸空梁
余故里無一椽之居臨行費盡躊躇意莫道恩恩遽束裝

攬轡登車感不禁

鳳城煙樹望森森才疎媿乏匡時略身賤虛存戀

關心且與波鷗同浩渺但期風鶴早銷沈小臣歸享昇

平樂好譜堯夫擊壤吟

至通州謁朱掖堂師師憂時感事悽然泣下卽席

賦呈

丁沽小泊謁師門重對元亭酒一尊寂寞衙齋聊共飲
艱難世事與同論丹心戀
主無歸意白髮憂時有淚痕此夕依依官燭底非關臨
別易銷魂

途次聞豐工復決

百計彌縫兩載中安瀾一奏慰

宸衷

璽書正敘防河績息壤難收止水功浪擲黃金填蟻孔
坐看赤子葬龍宮扁舟待赴尊鱸約愁聽哀磬滿浦豐

東昌以下寇盜充斥頗有戒心因賦一詩

秋色蒼茫裏全家一棹過江湖仍枕席天地正干戈骨
肉飄蓬慣山林伏莽多由來行路險不盡在風波

分水龍王廟

汶水西來疾如駛南北分流從此始盤渦怒捲風蕭蕭
中有神龍分此水我來祠下維扁舟拂衣竟登來汶樓
樓前疑有巨靈手直從咫尺分鴻溝水勢既分漕道利
數百年來拜神賜也同鐵弩射潮強更比金釵劃泉銳
方今寇盜猶縱橫漕船打鼓無由行安得神龍更助力
銀河淨洗東南兵

濟甯以下彌望皆水田廬市井不可復辨蓋皆屬
之南陽湖矣舟行過此詩以紀之

南陽湖茫茫千頃琉璃鋪水天一色渺無際但見風帆
點點有若煙中鳧我來欲渡不敢渡濁酒三日前村沽
天公知我有歸意北風忽轉竿頭鳥揚帆直下疾於鳥
又若怒馬馳平蕪遠山迎面忽已過回視惟有青模糊
胸中傀儡此一洗那怕浪花片片船頭轟忽然感慨發
胸臆坐念民力年來痛黃流滾滾決堤入河伯不念民
無辜運河故道那可辨但覺彌望皆菰蒲師莊仲淺盡
零落聖賢後裔嗟泥塗

師家莊子張故里
仲家淺子路故里

人民散盡市

塵改轉令舟楫成通塗舟行過此亦愁絕忠信安得豚
魚孚煙雲出沒盡盜藪往來估客咸張弧鬻饅縣竿血
淋漓如何未足懲萑苻噫嘻南陽湖我來豈果因蕪鱸
何乃出險復入險千金難買中流壺登鱸一望三太息
風波如此安歸乎

阻風彭口聞閘官劉君

梅

余鄉人也招飲賦贈

名紙何曾識鄉音頓覺同相邀輒脚局剛值打頭風冷
署一杯酒輕舟三尺篷微山湖畔路聚散太怱怱

中秋泊高郵有感

全家蹤跡似浮漚今夕荒涼此泊舟枕上無眠非待月

詩三
燈前有淚借悲秋波濤擊岸聲聲怒烽火連雲夜夜愁
我欲棄風竟歸去天邊何處認瓊樓

抵里門作

中年何敢便抽簪不爲煙霞返舊林雲被風吹任南北
萍隨水轉聽浮沈先幾媿乏觀時識早退原無避世心
欲共巢由買山隱故山松桂未成陰

旋里後聞蔡雲士前輩廣颺戚英甫同年士彥相

繼俎謝慨然有作

長安邸舍屢經過一別俄聞籬露歌春夢短長都是幻
晨星三兩已無多邑中同宦京師者止予在矣艱難時世驚烽火容

易光陰付逝波我亦傳聞誤生死居然海外老東坡此

次假旋因水程遲滯有傳予途中物故者

輓戚英甫

誰料一分手茫茫隔死生歸車纔駕鹿仙路已騎鯨舊
望虛鸞掖前遊憶鳳城螭坳俱對策雁塔互題名

北闕雲初曉午門坐班每與君同往

西陵雪乍晴今年正月與君同詣慕陵行禮時適值大雪朝衫常借箸官燭

每分明爲有妻孥累能無夢寐縈客囊雖淡薄家具早
經營路遠謀難定時危局易更錦帆遲就道墨經遽催
行君擬迎眷屬未果而以聞計南旋楚粵方流毒江淮正阻兵烽煙朝

言三
慘淡礮火夜縱橫瓜步兵全沒蕪城寇未平至今無勝
算而子促歸旌日落慈烏泣風高戰馬鳴憂天心耿耿
戀
闕意怳怳暑路麻衣重涼宵布被輕一身真若寄三豎
竟相攫迫我全家返遲君半月程中途頻問訊得信劇
疑驚紫陌花同看黃墟酒獨傾飄零歎吾黨迢遞念

神京

聖主原英武羣公自蓋誠如何駐貔虎未見掃鯨鯢追
想承平日常教樂事并歌場喧竹肉酒坐聚簪纓與子
同游宴相依若弟兄恩恩一回首處處總關情華屋人

何在青衫淚欲盈宦途皆傀儡世事等楸枰末路奚堪
問長眠幸已成彭殤無足較何況此浮榮

庚戌會試吾郡成進士者四人爲近科所未有今

年余與慎芙卿毓林南旋而英甫長逝獨王又沂

工部書瑞猶畱都下耳撫今思昔復成一詩

聖主龍飛第一科蓬山仙籍故鄉多賦皇州春色同游覽官樣文章互琢磨已愧散材徒擁腫
不堪生意更婆娑遙知今歲梅開日正曠風流水部何

寄贈撫部黃壽臣前輩宗漢

輕裘坐鎮浙西東喜聽輿歌遠邇同小醜自膏三尺劍

時新獲於潛新城
滋事要犯正法
健兒爭挽六鈞弓
手芟荆棘安民命

力護苞桑慰

聖衷數十萬家俱按堵
可知韓范在軍中
風流木楷何
欲識荊州未有因
秋風來作掃門人
玉堂舊許呼前輩
石戶新容作部民
樸略語言詢細細
艱難時事語頻頻
知公節鉞東南日
未改書生面目真

蔣節母詩

節母姓徐氏海甯硤石人年十八歸蔣君潞英
未踰年而孀又五年蔣君弟霽峯生子光堉節
母撫以爲子蓋其翁之遺命也又四年而霽峰亦卒

大無次子以光堉兼祧而議者謂潞英雖長庶出也霽
峰雖幼嫡出也長幼之序不能敵嫡庶之分今泛言
兼祧將以長兼幼乎抑以嫡兼庶乎節母慨然曰是
宜定之以服制請爲所生父母服三年喪而爲所後
者期議乃定是可知母之賢且明矣咸豐癸丑節母
卒嗣子以狀徵詩賦此

雙峰起突兀一水流東西我來拜節母但聽慈烏啼
節母初來歸光采生裳袿周旋兩始間笑語從無睽
持家既井井處室尤媿媿無何所天隕鳳去鸞孤棲
生雖未化石死已拌磨笄尊章泣相謂勸婦毋慘悽
小郎年十

言三
歲的顏如圭吾家千里駒行當生駉驥以是爲爾子
何必分町畦節婦敬受命再拜書幃幃自此屏華鈿自
此居空閨誰謂堇荼苦甘如飴與飴在萬十餘載同室
無勃溪叔妯果生男生男初孩提被之以黃襪衣之以
綠綈阿翁雖不見遺命猶可矜撫以爲己子膝下相提
攜兒幼始能食餽兒棗與梨兒壯始能行佩兒鰈與鱸
掌中一顆珠珍惜如鏤錫誰料造物者不可測以蠡伯
兮旣長逝存者惟叔兮一朝亦謝世總帳風淒淒止餘
孤生桐桐小枝猶低旣以爲楹桷又以爲椳題支持此
大厦未免愁顛躋而况議禮者紛紜如蝻蚩長幼固有

序冢介胡能齊介子幸有後足以供菹糝冢子轉無後
何以銘鐘鐃節母起斂衽正論覺吾迷服制苟不定進
退同藩羝願於所生厚以杜爭端倪而於所後降庶不
來訶詆一自斯言出懾伏老與覲義旣正於鵠理更明
如犀羣疑自此決不必煩靈螭君看桃李花其下恒成
蹊故知節母後宜受福與禋况此不凡子英氣凌虹霓
至孝尤難及非止茅容雞側聞侍疾時股肉手自割潛
德有如此後福良可俟孫枝更秀發繞砌生蘭蕙會見
一門內聯步青雲梯雙峯起突兀一水流東西我來拜
節母但聽慈鳥啼長嘯紀顛末苦語同寒蛻備員忝史

館燈火分青藜倘編削女傳何敢忘貞妻

除夕口占

自拋簪笏奉潘輿又見春風到敝廬牲醴不豐因歲儉
光陰最好是家居休嫌琴劍仍無定且喜簞瓢尚有餘
此夕樽前聊盡興烽煙莫問近何如

春在堂詩編三

甲丙編

春在堂詩編四

甲寅元旦試筆

隔年燈火曉猶存起飲屠蘇酒一尊
庭院清閒刪俗例冠裳檢點媿

君恩詩成試倩兒拈筆客到聊呼僕
應門莫道晨寒添料峭尙畱餘暖在
粃盆

平泉舅氏及雲笈均和余除夕之作因次前韻又
成二律

年來歲月半舟輿且向東湖暫結廬敢謂在山成遠志

偶因奉母得閒居冷官况味憐貂敝貧士生涯賸蠹餘
尚有凌雲詞賦在莫將落拓笑相如

一年景物此權輿回憶承明舊直廬闕下清班叨侍從
雲中仙仗護

宸居諸公俯仰昇平日羣盜縱橫轉戰餘坐對辛盤聊
盡醉書生報

國待奚如

穀日招同諸親友宴集疊元旦韻

柏酒桃湯俗例存間招親故共開尊時方多事能同醉
天與吾曹算有恩快雪初晴宜雅集舊游如夢憶都門

傾銀注玉徒豪舉未及田家老瓦盆

先祖南莊府君中乾隆甲寅副榜迄今六十年矣

偶檢甲寅齒錄敬誌一律再疊元旦韻

題名小錄檢猶存相對儼如古鼎尊書卷叢殘三代物

科名絡繹

四朝恩浪傳仙籍通蓬島依舊儒宮守華門此日家居
人事少何勞斗麩綠珠盆

雲笈將赴江西賦四律畱別諸親友卽次原韻贈
之

潞河去歲整歸裝每到涼宵共舉觴

去歲與君同舟南下

故里荒

燕憐我寄好官滋味羨君嘗向來家世鳴琴慣君大父作令江
右此後光陰聽鼓忙尚有書生餘習在徧徵詩句付行

囊
頻年戎馬擾江村見說嚴城晝掩門去夏江西省城被圍三月弧矢

豈非吾輩事袴襦正賴長官恩軍符絡繹看傳箭里社
權呼聽扣盆倘有桐鄉餘愛在春來正共薦羔豚君祖在江

西有惠政故云

蒲帆挂向永和隄兩岸流鶯恰恰啼三月春風隨宦轍
五更寒月聽征鼙飄然鳧鳥惟攜鶴君眷屬未偕往莞爾牛刀

且割雞他日清聲能繼祖甘棠種徧大江西

待將出處卜靈氛愧我荷衣製又焚偶爾在山仍小草

縱然出岫亦閒雲五湖虛願何時遂百里循聲到處聞

兼謂王甫家兄只惜服官中外異未能鷗鷺訂同羣

平泉舅氏選授上虞學博賦詩畱別次韻二首

一紙除書在臘前者儒深荷

九重憐行窩安樂迎康節福地嫵嬛住茂先帶水溯洞

鄉樹近瓣香供奉士林虔勸公休悵彈冠晚看取精神

滿寸田

萬事如雲過眼前即用舅氏詩意官將塗抹博人憐靈椿莫道

株將老都蔗還期味勝先軍府文書旁午急儒官俎豆

上丁虔稚川石室曹娥水便是先生彭澤田舅氏以議敘知縣改

就廣文故云

海昌陳浣江惟亨行年八十賦重游泮宮詩徵和

卽次韻奉寄

下澤逍遙馬少游而今已作魏羅侯任看後輩雷燒尾
終讓先生雪滿頭篋內青衫存故物花前白髮領時流
耆英會上一尊酒更有何人共唱酬

清明日回德清掃墓偶成

烏巾山下舊柴荆喜有承平一片聲父老釀錢迎綠社

吾鄉以清明日爲紅明日又

吾鄉清明前後賽社有紅社綠社之分

兒童散學過紅明

吾鄉以清明日爲紅明日又

次日爲白明日連朝榆柳分新火幾處松楸認故塋只惜焚黃
猶未得虛傳兩度拜

恩榮予兩次請封而救命未至

半月泉

半月泉在德清北門外慈相寺之東以形侶得名東
坡有詩曰請得一日假來游半月泉何人施巨手劈
破水中天今刻石泉上舊有屋數椽歲久傾圮慈相
寺僧上雲謀築樓三楹以爲邑中士大夫游觀之所
又東萊書院久廢有司致祭無以陳俎豆樓旣成卽
奉東萊栗主於其中亦善舉也故爲詩張之

蟾寒兔冷吳剛愁手持玉斧窮雕鏤劈破半月風颼颼
化爲一水清瀏瀏東坡先生官湖州請一日假來此游
欣然題詩在上頭而今精舍成荒丘惟此半月仍如鉤
老僧好事工新鳩一樓高築山之幽名蹟長使東坡畱
祀典并爲東萊籌嗚呼所慮何其周僧能若此吾儕羞
廣寒宮闕雲中浮萬百千戶年年修神斤鬼斧無時休
願與月中仙人謀移一二戶來山陬眼前突兀成此樓
然後招集諸吟儔攜酒一榼茶一甌狂吟遠與髯翁酬

寶寺

德清西門外有寶慶寺亦古刹也寺前松徑里許旁

有石可坐十許人奇古可喜相傳建文帝曾憩此故
名蟠龍石寺中有僧像方頤廣額云卽建文帝也因
以詩識之

命舟出西門舟窮繼以屐但喜山寺深不嫌村路僻松

陰一徑青雲氣千巖白望蠡已無亭舊有望蠡亭以望
見蠡山故名今圯

蟠龍猶有石相傳建文君曾此畱遺迹至今老佛像猶
在梵王宅巍然天人姿修髯可半尺祝髮頭不冠跣坐
足不寫我思明惠宗守成亦令辟削藩議未成靖難師
已迫可憐一炬火坐看六宮赤恩恩鬼門啟草草神器
擲度牒奉先皇袈裟換宮掖君臣雖偕行姓名已潛易

但覺僧臘高都忘年號革間關蜀道行辛苦滇南適誰
知此一丘亦來分半席我今瞻遺像歷年逾數百殘碑
尚可捫斗室不嫌窄泠泠鐘磬清落落塵氛隔寄語好
事者應題大喜額

大喜乃建文帝庵名

蟠龍石

兩龍夭矯戲宮柱一龍飛上九天舞一龍不勝墮泥土
何時蜿蜒來此山山中之石遂千古我思劫運當年遭
骨肉竟爾干戈操雨中羊毛打更溼城上燕子飛逾高
燕子飛來龍遁去莽莽風雲竟何處金陵形勢空復雄
不是龍蟠是虎踞何如此山清且幽道旁片石龍來游

白龍之庵一炬燼白龍亦建文帝庵名龍兮龍兮何不長此留雲

冥冥風謾謾怒捲松濤滿山谷龍雖失水尙有神長使
蚊雷靜三伏相傳石旁數十武內夏日無蚊我來問石石不知但驚此

石何離奇至今父老石邊坐猶語龍衣拂地時

寄呈座主惲薇叔廉訪光宸

滕閣秋風淨洗兵喜聽鶴唳盡銷聲恩流召伯甘棠舍
功在條侯細柳營鮒冠高人鐵面蜒蚰塹固地金城
遙知

聖主東南顧只有章江水最清

回思烽火逼洪都手畫灰盤膽氣麤天上狼弧誅窳窳

地中鼠穴塞黠齷背鬼有隊軍容肅肺石無冤衆志孚
會見封疆膺

特簡豈惟治律賴皋蘇

不才何敢擬彭宣得隸門牆已十年末議未堪參玉帳
後塵竟許步花磚時平鶯啖停傳檄道遠龍門阻執鞭
飛到郇公雲五朶如聞絲竹絳帷邊

自從奉母出長安小住鄉關半載寬書卷無多先世物
門庭如舊秀才官藥槎已悵蓬山遠吹律難回黍谷寒
慙愧辦裝猶未得虛煩長者問彈冠

佛日龍居紀游各一首

暮春天氣佳扁舟游佛日水窮山逾深村僻路更仄蒼
髯百尺高玉槩千株密泉從舄下流雲自袖中出有亭
翼然起招客於此息四面羅幘峴一泓湛明瑟疊石成
危橋因山開淨域高登楞嚴臺小坐維摩室雀舌茶初
焙猫頭筍乍茁且共飽伊蒲無須參米汁飯罷坐門前
披襟更岸幘投石破清冷攝衣走劣崩黃鶴不復歸山
舊有黃鶴樓白日俄已昃遙指龍居山游事固未畢
既辭佛日寺爰至龍居山入山未及半一亭當其間松
徑走曲曲竹筧流潺潺不嫌石犖确但喜山迴環雲中
兩鴟吻林表千螺鬟崎嶇逐樵跡剝啄敲禪關新葉已

可翫繁花猶未刪坐久佛無語興盡我亦還笑叱田中
犢驚吠花間獮山花採躑躅山鳥聽絲蠻何意浮生內
有此半日閒但惜游未足安知時方艱入林志已決買
山資猶慳題詩枯木堂猿鶴無相訕

戲詠西瓜燈

一場瓜戰夜初停幻出團團滿月形聖火養成千歲綠
仙丹煉就十分青擎來何減琉璃盃照去偏宜翡翠屏
不是金刀能割膜癡皮那得化空靈
剝盡層層液與膚此中亦自費工夫光明豈減燃臍董
空洞真成剖腹胡笑爾燭奴無位置比佗雲母略模糊

世間何物堪相擬只有回回青亞姑

宵深移到讀書堂伴我青燈味更長但使腹中無磊塊
自然頂上有圓光莫嫌燄燄膏將滅且喜熒熒火亦涼
不解朱門歌舞地高燒紅燭照紅妝
但覺光華竟夕增居然清侶一輪冰也同天上青藜火
不比人間黑漆燈我輩生涯原淡淡箇中消息自騰騰
玉堂不少金蓮炬讓與西清舊

仲冬八日入都銷假偶成四律述懷

風雪正漫天全家送上船未能供菽水何敢戀林泉門
戶憐兒小晨昏仗婦賢此行殊惘惘慙媿祖生鞭

一載鄉山住依然四壁空伶仃同命鳥辛苦寄居蟲報
國原無具謀生亦未工誰云游宦樂吾輩是飄蓬

況值艱虞日年來事事非一官翻是累入口竟何依江

左烽煙逼閩中信息稀時久不接王甫兄信臨歧數行淚灑上老

萊衣

行止猶無定歸田計更賒白頭親望遠赤手婦持家世
事那能料吾生長自嗟何時一尊酒聚首又天涯

嘉平十八日抵都門作

去年南下奉潘輿小住鄉山一載餘清夜猶然媿烏鳥
聖朝未敢戀鱸魚飽嘗世味豪情減久別京華舊雨疎

遙望

觚稜天咫尺晨光未辨早登車

年來鈴索隔西清問訊東華舊弟兄吾輩蝨官何所用
幾時蛾賊得全平媿無才識難修史縱有文章敢論兵
惟願南天烽火息好將詞賦獻承明

予里居時卽聞房師孫蘭檢侍郎殉難金陵到京

後詢悉其詳盡然流涕敬輓四律

都門小集餞行旌師去年夏以兵部侍郎視學皖江予與諸同年餞之城外太息江

淮正阻兵千里蟲沙迎使節五更鶴唳警危城風塵莽
莽文星暗江水茫茫礮火明半載恬然心不動男兒南

八豈求生

師與余書云衽席之上
時聞礮聲而心自恬然

烏鳥情深不自知毅然一疏坑

丹墀堂前甘旨謀歸養江上旌旗

詔督師

時有旨命師督辦防堵而師適因親病疏
請歸省遂忤上意鐫秩而師已殉節矣親

舍白雲虛有夢戰場碧葬竟無屍皖公山下遺民在猶

見先生罵賊時

春風桃李滿門牆獨許彭宣到後堂詩格微嫌近郊島

師誦余詩曰惜
山林氣太重

文章謬許伯齊梁

師極賞余
四六文

科名敢望

傳師鉢翰墨聊堪侑壽觴

師去年于危城中寓書
索予文為堂上壽

試取

遺書重展讀零星都在篋中藏

為憐歸客侶飄蓬費盡經營半載中羽檄倉皇虛講席

手書稠疊付郵筒

師知余乞假歸即為言於皖省當事
延主徽郡紫陽書院雖為兵事所阻

不果赴然為子
計則甚周矣

旄頭妖氣連江表箕尾忠魂返太空賸

有不才門下士瓣香長自奉南豐

乙卯二月初八 國史館

一入承明歲月加又來史館駐朝車坐中前輩尊於佛

架上官書亂侶麻

聖世何須有南董直廬且喜傍

東華

小臣

願紀昇平事歸向田間父老誇

與王補帆同年

凱泰

南下窪子散步

酒座歌場處處豪偏將野興寄林泉亂墳多鬼人稀到
古寺無僧犬獨噪自覺閒身宜此地天教冷趣屬吾曹
明朝吏部門前去又染緇塵到做袍京察人員例于吏部唱名而翰詹衙門實無到者是日院吏來告故戲及之

八 四月初二日内子率兒女輩到京喜賦

滿地干戈行路難輕車安穩度桑乾回思往事都如夢
且守清貧莫當官室內塵埃聊布席盤中粗糲強加餐
全家願似梁間燕隨意營巢到處安

六月八日偕孫琴西衣言朱晴洲文江邵沐生亨

豫錢湘吟錢王補帆凱泰楊振甫慶麟何受山福

咸 諸同年至龍樹院作竟日之游紀之以詩

九衢車馬地所難此清曠每逢明瑟處便覺心神暢吾
輩不羈人疎慵天所放閒官幸無事勝友時見訪同游
古招提芒鞋各一兩是時天新晴蹄涔水猶漲迂迴取
路行聯翩樂興往入門僧不迎老槐屹相向倚欄一平
視蕭然出塵綱萬頃足蘆葦一城匝屏障遠寺紅入畫
平疇綠成浪諸子發高興酒佐跌宕僧廬無主賓行
厨有供張語妙雜詠諧交狎忘揖讓揮扇可代塵脫衣
各置衿或丁丁然棋或烏烏然唱相期竟日游惟酒亦
無量東坡赤壁下逸少蘭亭上須知今日樂便足古人

抗飲罷半醉醒歡極齊得喪誰棄使者車請更與祖帳
岳忠武名印歌爲楊漱芸丈炳春賦
鄂王有遺印流傳在吳市翁過吳門偶得此大名照耀
日月寒正氣鬱盤魑魅死我思宋南渡半壁愁難支惟
王起卒伍所向咸披靡郟城一戰兀朮走中原父老迎
王帥兩河豪傑盡響應大書岳字縣之旗此時此印亦
生色草檄飛書走南北想見山東河北間兩字傳來人
盡識惜乎和議朝中成金牌十二俄收兵只消三字莫
須有頓教萬里隳長城要其忠勇足千古物以人傳媿
璜琥笑佗高廟玉孩兒得失區區何足數翁從吳市攜

來燕藏之篋笥光燭天因我好古出相示殷勤索我詩
一篇嗚呼英武如王今古最建炎中興功莫大方今盜
賊滿江湖安得其人寄闕外願將此印鈐軍符重向東
南破楊太

平泉舅氏寄示自嘲一首因次韻奉酬亦以自嘲
一官忝玉堂屢踏東華土移家日下居城南天尺五羣
謂列清班容易紆華組誰知毛生雖依舊囊中處方今
聖人世玉燭調四序如何兩階前猶未舞干羽諸君駕
輜軒方將祭纍祖乃聞疆吏言東南無定宇暫停賓興
筵軍門聽鼙鼓時因軍興停鄉試者七省吾黨二三子困守伯通廡

報

國僅文章未足資禦侮官冷我亦冷蕭然如太古僮僕
 有怨言其言藏腹肚曰自從爾來冬寒夏暑雨衣有卅
 年裘食無四升簞不知竟何得無乃徒自苦主人微聞
 之一笑而不語不見吳楚間烽火照洲渚生民罹此虐
 流離那可數黃河天上來勢欲傾底柱側聞中州地滾
 滾魚龍舞吾耕既無田吾隱又無墅四方既靡騁歸歟
 計又阻避世金馬門是亦得吾所囊中有俸錢一可當
 什伍時行當十當五大錢官米新且潔猶足人一鬴春季俸米從採辦處支領
 甚舊雨時往來相對無齟齬興到吟一詩亦足寫情緒

何必泣牛衣沾沾學兒女

命命八月初二日蒙干地

恩簡放河南學政恭紀

金殿揮毫墨尚新

四月十三日保和殿考差

又看

恩命出

楓宸頒來蕩節從

天上駕得輶車向洛濱自是采風宜太史敢云入境卽

壬人

小臣

舊是村夫子竹負書生面目真

九月二十四日出都赴豫口占

去歲風霜賦北征今年稟傳又南行一樽仍喜家人共

千里頻煩候吏迎烽燧平安官堠近琴書瀟灑使車輕
男兒駟馬尋常事每把題橋笑長卿

上人滹沱河懷古

滹沱河冰薄於紙白水真人飛渡此今日猶傳危渡名
當年早卜中興始嗚呼項羽倉皇走大澤不能安坐烏
江舟苻堅投鞭笑天塹不能遂作江東游惟有真王所
至神爲謀往往奇跡人間留錢唐之湖可使三日而不
至旃然之水可使千年而不流願將此意廣作叔皮王
命論掃盡潢池擾擾千蚍蜉

同公郎鄆呂翁祠

浮雲過眼了無痕得失區區未足論我亦偶然來入夢

忽乘薄笨忽輪軒

一甌黃梁熟又炊神仙莫笑世人癡人生何必都無夢
只要先知有醒時

丙辰二月初三日出棚考試大風渡黃河作

黃河無風浪千尺况乃有風風又逆風浪聲中鼓吹高
使者河邊祭河伯河伯其聽使者歌人間何處無風波
但令胸中無芥蒂那愁腳底有鼉鼉臨河卻爲蒼生慮
從古河防無善計百萬金錢付水濱不飽魚龍飽官吏
頻歲黃河向北行狂瀾幾徧山東地轉瞬桃花春漲生

或疏或築無人議此間羣議更悠悠大河北徙吾無憂
豈知河性固難測侶宜未雨先綢繆書生欲言苦非職
蒿目空爲生民愁焚香敬向河干祝惟爾有神雄四瀆
但願安瀾慶九秋莫教怒浪生三伏河伯有知應軒渠
笑我此意徒區區廟堂自有河渠書幸無竊竊憂其魚

陳橋驛

天將神器付香孩兵次陳橋帝業開一襲黃袍麾下進
數行丹詔袖中來出師倉卒原無寇受禪從容大有才
讓表錫文多事甚始知魏晉太遲回

余校上終日危坐堂皇偶成五言一首

使者承

簡命秉節來中州大懼不稱職以爲
朝廷羞念此童子試貴在真才求士人旣讀書必先泮
水游於此苟不慎魚目充琳球文風固必飭弊竇尤宜
搜如何作僞者悉數而未休羊質或盲虎鵲巢或居鳩
歷與蚤相負鼠與貓同謀使者坐堂皇耳目仍未周敢
云弊盡絕鬼蜮無能售亦姑盡吾心勿使滄薰齋吾耳
所及聞或者無鶴鷗吾目所及見或者無蚍蜉不然土
木耳毋乃徒悠悠舉惟時一望朔風吹颼颼諸生田間
來大半寒無裘更有八十翁霜雪盈其頭風檐執卷寫

言四
落筆幾成牛所願止一衿未卜何時酬使者獨何幸年
少登瀛洲舉比而絳帳門外擁八騶敢不盡其職以副
君恩優書此置坐右聊當箴銘畱

校閱步箭作

使者本詞臣素未習弓矢如何坐堂皇以此試多士豈
知桑與蓬事本屬男子使者雖不射亦頗知射理志正
而體直道在求之已徒誇弓六鈞止一健兒耳登堂肅
衣冠呼名慎跪起心平手自調然後奏爾技不中固足
羞中亦勿遽喜須知秉筆者更有鵠在紙余校士時凡
所中之箭偏
正高下均分別
存記以定去取

湯陰謁岳忠武廟

十年閫外枕雕戈奈此秦頭壓日何南渡君臣生氣少
東窗夫婦殺機多功高豈意翻成罪戰勝無端更議和
不待籲天誣早辯精忠二字總難磨

蘇門山紀游

行部古共國遂遊蘇門山山光旣明瑟泉韻尤潺湲於
此一俯仰洗我塵中顏孫登有嘯臺高出浮雲間太行
與王屋舉手疑可攀惜乎塵冥冥掩盡千螺鬟是日適
大風
嘯聲不可聞但見斜陽殷下山殊自媿緣比嵇康慳
子在川上處載籍固無考乃登茲山巔鴟吻聳雲表其

上宮牆高其下清流繞雖屬想當然附會良亦巧

山上有

文廟門外建坊原泉來混混有本不嫌小仲尼歎水哉

題曰子在川上即水可見道安知非此地悠然契懷抱我來拜遺像冕

旒而垂藻蘇門理學藪講堂餘蔓草伊洛徒茫茫淵源

問誰紹

蘇門最勝處無如珍珠泉泉從山下出顆顆珍珠圓誰

能探泉脈疑有驪龍眠水清可見底石罅鳴濺濺憑欄

此小坐靜對水底天念自來河朔校士逾數千得毋逃

五色凌亂丹與鉛掬水洗吾眼愛此清且漣庶幾校士

時雙瞳常瑩然

少小走風塵頗具煙霞癖每逢佳山水往往蠟游屐布

鞵與青鞋焉往而不適今棄使者車偶來駐棨戟鳴騶

泉石間毋乃成俗客顧念風景佳北方罕儔匹竹影滿

園清松陰半窗碧何怪東坡老於此願卜宅我生亦如

寄雪泥無定迹借問安樂窩可許為我闢

山上有邵康節安樂窩

先君子曾應康蘭皋中丞之招客游懷慶府之緱

山村集中覃懷遊草兩卷乃其時所作也迄今二

十二年小子樾持節經臨感懷風木乃歎王僧孺

引騶清道悲不自勝良有由也因口占四十字

手定覃懷草先人自紀游三年曾此住兩卷至今留舊

德憑誰問浮榮未足酬經臨無限意太息爲停騶

修武縣武童蘇振邦縣府試皆第一院試時中馬

箭三步箭四因亦置第一以詩紀之

庭前弧矢士爭彎愛爾登堂技最嫻且博一衿游泮水
儼同三箭定天山臂強能挽銀牙弩齒少猶陪玉筍班
萬里封侯如有分休忘此日奪標還

峭山

驛路過峭陵危巖幾度登馬蹄雲破碎鳥道石峻嶒徑
窄痕如鑿山深氣似蒸輪軒猶畏險憶否昔擔簦

虎牢

巖邑曾傳鄭虎牢驅車過此亦堪豪雨晴白日雲猶
風小黃河浪自高一綫奔流來底柱千盤隘道出成皋
山川形勝今猶昔慙媿書生擁節旄

緯夫行

河陝間山路崎嶇輿行必以緯夫挽之與行舟無異
余昔年往來新安江舟行灘石間邪許相聞曾作緯
夫行紀之乃肩輿登山亦復如此因再紀以詩用識
行路之難云

頑青鈍碧起迎面高可千盤寬一綫輿丁欲上愁遷延
乃仿船家例用緯西至函谷東成皋鄭之虎牢秦之峭

古來天險此為最我行往返何其勞千搖萬兀人無數
挽我千山萬山路山上人家半穴居山中車馬皆縣度
昔者吾游新安江江水日夜流淙淙百丈挽舟舟不上
森然怪石船頭撞何意輜軒經此地竟與乘舟了無異
世間行役總勞人未覺榮華異顛顛為吾傳語語緯夫
勿言爾力今朝痛行盡馬鞍七十二夷庚從此無危途
自洛陽至陝州俗言有馬鞍七十二蓋山形高下如馬鞍也

輓周雲笈七十韻

雲笈需次江右尚未補官去年冬署安義縣事城小
兵單寇氛密邇請兵請餉皆不應至今年正月十九

日賊犯縣城雲笈率練勇數十人出城迎敵手刃三
賊身受數創眾寡不敵旋被賊害嗚呼可哀也已雲
笈名承謙後更名祖誥仁和人庚子舉人素性慷慨
以忠義自負與余交最深又重以姻婭之戚二十年
來鄉里釣游長安文酒未嘗不與君共也四月間余
校士洛陽適聞此信中夜傍徨達旦不寐即欲以詩
輓之愴然不能握管夏間避暑省垣遂成五言七十
韻回憶雲笈赴江右時賦詩留別余次韻和之曾幾
何時又有此作每憶昔游不自知涕淚之橫集也
平昔談忠義惟君最激昂艱難寄民社慷慨死戎行毒

霧連吳楚烽煙逼豫章一行初捧檄百里正籌防城小
 謀增壘田蕪議積糧官猶如傳舍寇已在垣牆自謂心
 俱赤人看鬢漸蒼君到任後籌防蠟九詞宛轉羽檄警
 倉皇弩鏃飛青石軍符走赤囊居民爭罷市幕客半成
 裝伍子昭關出臺卿復壁藏而君期必死到此意如常
 張日麾孱卒銜鬚赴戰場靴中刀伏突腰下劍干將陣
 合雲俱黑軍孤氣轉揚賊顛迎刃脆戰血濺衣涼力竭
 仍摩壘圍深更裏創虬蟬誰赴援猿鶴竟偕亡先軫元
 還在真卿體未僵忠骸盛馬革淨土借鶯王賊入城後遺民殘卒
 移君骸骨至塔下寺手爪堅猶握須髯怒尙張健兒齊漉酒父老

競焚香旅櫬歸先兆靈風動故鄉麻衣憐幼子白髮泣
 高堂七品官如舊千金債未償晨昏惟婦奉門戶獨兄
 當有女啼偏苦無言意自傷九原從死父一慟斷柔腸
君弟三女已聘為大兒婦聞君計悲甚而卒四月十七日事忠孝都無憾存亡兩有
 光憐余感疇昔未免涕沱滂姻婭相依始承平樂事長
 里門同角逐壻水共倘佯君婦乃平泉舅氏長女與室人兄弟也交密形
 骸略談高意興狂大文徵典冊小字寫巾箱身世常交
 勗詩文每互商長安游竝轡逆旅臥聯牀謀及藿鹽事
 鈔來疥癬方君患癬幾十年古甄誇得晉僻句戲搜唐險韻追
 韓孟清言雜老莊笙歌喧酒坐風雨靜禪房迨我全家

返邀君一葦航長途多跋涉羣盜况披猖鄉樹連天遠
軍烽入夜望聯艦共南下冒險走東昌彭口風澎湃微
山水渺茫提攜憐涸轍安穩喜歸艤飛鳥回巢暫行雲
出岫忙故山無遠志先世有甘棠君祖曾作行篋詩千
首君赴江西時以詩贈行離筵酒一觴清游雖佛日臨
前與君同客路已錢塘滕閣尋秋色豐城訪劍鏃郵筒
問眠食治譜語循良見說兵猶頓傳聞歲尙穰牛刀曾
小試君代理豐鳧舄待高翔余亦還都下年來又大梁
素書蒙問訊玉尺媿評量君聞余視學中州馳書相賀
義噩耗來江右輶車正洛邨一緘開鄭重五夜起傍徨

青史千秋事丹心百鍊剛成神宜蔣尉爲鬼亦睢陽疆

吏應陳請

廷評例表彰身登忠義傳家襲羽林郎大義真無忝私
情自不忘名雖畱竹素夢竟醒蕉隍位未將才副文偏
與命妨衣冠存碧葬事業付黃梁驥足何曾展髦頭尙
有芒狂瀾誰砥柱勁草自冰霜入世悲知已憂時弔國
殤人琴無限意不僅爲潘楊

戛詠茉莉花籃

誰將金翦翦花叢愛此筠籃製最工采縷穿成珠絡索
冰壺盛得雪玲瓏幾層素蕊垂垂小一味幽香曲曲通

紙帳煤花添韻事今宵清入夢魂中

貓

花陰晝靜盪酣眠時復低聲喚膝前提抱慣從嬌女手
摩挲深得主人憐一身白雪經宵暖兩顆明珠過午圓
癡坐苔階呼不覺看佗胡蝶舞蹁躑

狗

信猶如豹亦堪豪臥守閒庭敢憚勞搖尾宛能通主意
論功殊覺勝奴曹但求食粟恩無媿莫笑看人眼不高
可奈青蠅飛侶雨花前小坐自爬搔

周容齋先生

爾壚

工書善談因耳重聽談輒以筆

每過余談必以

城子楮先生將命焉因以詩贈

昔聞米襄陽筆硯不釋手坡公海外歸盛名動山斗米
時知睢州遣使迎馬首坡亦欣然來兩賢共尊酒賓主
各一几筆硯無不有列紙數十番高可齊戶牖談諧興
旣酣觴詠時更久二公俱命筆紙上雲煙走無何紙亦
盡各付奚奴負相易而持歸詫歎謂非偶蘇米書中豪
名壓唐顏柳偶然此游戲勝事遂不朽文采與風流照
耀千載後先生今東坡雲夢胸八九時時從我談能以
筆爲口大書舞龍蛇小字摹蝌蚪我亦手握管相對顏

怩丑秋蚓與春蛇落紙字字醜客是蘇子瞻只惜主人

否
內子因余校士甚勞勸勿作詩余雖感其意而不
能盡從其戒戲書數語貽之

天生劉伶酒為名婦勸勿飲伶弗聽天生吾乃不飲酒
問婦如何婦曰否君雖不飲苦吟詩吟詩太苦傷心脾
勸君并詩亦勿作胷中浩浩又落落吾謂卿言雖復佳
無詩何以寫吾懷
吟詩不求好隨筆而書隨意造
不雕不琢全吾天問婦如何婦曰然

朱亥故里即朱仙鎮

晉鄙雖宿將畏秦避其鋒一軍次蕩陰莫救邯鄲攻信
陵盜符至猶恐眾未從奮椎奪其軍朱亥真英雄遂使
信陵君名震崑函東悠悠晉鄙輩何足謀成功驅車夷
門下敬問七十翁如今風塵內可有人如公

沮溺耦耕處在葉縣

周衰天地閉賢人隱於耕尼父與之遇惓惓懷深情苟
肯從吾游莫非三代英不然沮與溺混迹蚩蚩氓問津
且不告豈復言其名以魯論語紀載殊分明乃知聖
與賢汲引出至誠諮訪其姓氏考論其生平遂令千載
下猶留二子瑩既歎斯人高復感吾道宏使者驅車過

田疇何縱橫豈無隱君子出而憂蒼生

昆陽懷古

漢兵困守昆陽城昆陽城外百萬兵長人十丈巨無霸
虎豹犀象來縱橫一夜風雷飛屋瓦白水真人到城下
不知募兵兵幾何但覺軍聲動原野人獸辟易無敢當
伏屍流血滄水赭何須符命奏疆華早已威名震銅馬
嗚呼有晉之元帝有宋之高宗歷數古來中興主幾人
能與蕭王同我行經昆陽慷慨懷英風光武以數千人
破莽百萬衆昭烈連營七百餘里無成功興亡一半由
天意一半亦貴人謀工我思光武真英雄

新野學文生徐鶴年已告給衣頂而歲試考列弟

一予因其文理尙優且年例未符仍準應試以詩

紀之

老大徒留鐵硯銘已拌乾死按頭螢誰知旗鼓一鬢俊
又冠香花千佛經豈僅寒氊留故物還期庖刃發新硯
春風大有噓枯意莫到秋來柳便零

許州試院乃蕭謙谷先生

元吉

官此時所建予校

士至此見其規制崇閎工程堅致徘徊庭樹不勝

甘棠猶思之意因賦五言詩一章

校士至許昌有懷昔賢牧昔賢牧爲誰蕭君字謙谷試

院舊湫隘規模亦褊促蕭君顧而嗟欲然意未足城之
東南隅有地吉可卜舍舊而謀新半年勞奮揭堂庶旣
崇闕屋廬更連屬列舍東西寬重門內外肅使者之所
居閒庭蒔花木賓幕之所休明窗悅心目官吏此趨公
不復憂寒燠士子此構思不復溷麤濁至今二十年庭
樹猶餘綠賢者蕭使君多士蒙其福况君多善政非此
一事獨千仞築宮牆百里開鄉塾君修文廟宮牆及
均見州志求之古人中文翁之治蜀自從軍興來文場
藥局美哉奐與輪未免憂傾覆古人一日居猶必葺牆

屋如何賢牧功零落無人續使者坐堂皇慨然寄遠矚
起撫庭前樹風來聲謾謾甘棠猶思之夫何媿尸祝我
爲賢牧歌歌盡紙一幅旣表昔人賢亦爲後人告

許州武童劉占元能左右射左右各發五矢各中
四矢因取置弟一而紀以詩

左右皆能射端推巧力全挽強猿臂健破的蝨心圓楊
葉穿應可芹香采獨先天山三箭足盼爾勒燕然

題劉松嵐觀察大觀弔武虛谷先生墓詩手卷

武虛谷先生諱億河南偃師人以進士出宰山東博
山縣多惠政時相國和珅遣番役至山東有所訶察

役暴橫莫敢誰何先生執而杖之坐是罷官歸益研
究經義所著書十數種及和相敗有

詔起先生於家而先生已卒劉松嵐觀察過先生墓弔
以詩今墨蹟藏其家先生孫名來者乞余題詩於後

因為歌曰

先生卓犖人中豪爲民作爹身忘勞虎而冠者來咆哮
擇肉而食誰所效縛而杖之無由逃羣羊畏虎聲嘈嘈
人生窮達隨所遭安能俯仰如桔槔拂衣歸去嵩山高
經疾史恙窮秋毫一旦見峴冰山消

璽書俄受彤廷褒公已先赴巫陽招徒畱坏土埋蓬蒿

有客過此歌且謠其聲慨慷心鬱陶爲風爲雨爲怒濤
筆力斫斷生鼉蛟翩然鳳翥鸞翔翱我披此幅風蕭騷
願君寶此如瓊瑤長使祖德千秋昭

明巡按御史揭帖歌

明直隸巡按御史徐吉揭帖蓋爲吳民挺擊緹騎一
案而上也帖中共十三人除世所共知顏佩韋等五
人外尙有吳時信劉應文丁奎三人皆預挺擊之事
又有戴鏞楊芳季卯孫許爾成鄒應楨等乃因赴浙
緹騎驛騷於胥門外衆怒焚其舟事出同日遂并爲
一桉者也顏佩韋等駢誅今所傳五人墓是丁奎季

卯孫許爾成皆杖徒楊芳鄒應楨皆杖戴鏞死於獄
之數人者雖市井梟散之徒而激於義憤以有此舉
尚不失為三代直道之遺徐公治此獄意主消弭保
全實多此帖本當時公牘鈐有巡按御史印章傳二
百餘年紙尚完好周容齋先生得而藏之索詩於余
因賦此

校尉來猛如虎駕帖來逮吏部姑蘇城中十萬戶十萬
戶人齊焚香願為吏部求都堂 青青子衿萬口一言
願都堂草疏雪吏部冤都堂願有泚校尉怒下 是何
鼠子敢抗魏公旨 皇帝聖旨乃出魏璫一夫大 登

公堂是非詔使擊之無傷萬挺齊下誰能當為之首者
顏馬周沈楊此外若劉若丁若吳環起如堵牆羣虎失
勢化為羊或死或匿或走且僵 峩峩巨觚自北來泊
胥門外癩如雷市上之屠僧戴鏞驛中之輿臺楊芳一時同
受池魚災入城呼者季與許奮臂一麾眾皆聚艤舟而
待鄒應楨千人萬人爭此一枝艤火其舟校尉愁浙中
游今且休 事聞於朝謂吳中亂厥臣眈眈欲發大難
火急文書下撫按臣心苦為周旋獨坐西臺斷此桎
巧借詔旨示矜全未便株連擾里閭重者竿首輕者笞
若者鬼薪若城旦 天啟六年六月御史徐吉據事直

